


蜀中名勝記
四





蜀中名勝記

(四)

曹學佺著

蜀中名勝記卷之十九

重慶府三

涪州

華陽國志巴子時雖都江州先生陵墓多在枳又云涪陵郡巴之南鄙從枳南入折丹涪水與楚商於地接司馬錯昔取商於繇此道也漢時恆有都尉守之蜀延熙中車騎鄧芝以江州都督治陽關於此陽關者巴子所置三關之一○水經江水東至枳縣西延江水從牂柯郡北流西屈注之又云江水至巴郡涪陵縣注更始水酈註曰水東逕陽關巴子梁江之兩岸猶有梁處寰宇記云岑彭破公孫述將侯丹於黃石黃石者橫石灘也謂之石梁○水經註曰江水東至梨鄉歷雞鳴峽江之兩岸有枳縣治故華陽國志謂枳縣治涪陵水會庾仲雍謂有別江出武陵者也又曰更始水卽延江枝分之始也延水北入涪陵水王莽更名巴亭張堪爲縣會公孫述來擊於時同心義士選習水者筏渡堪於小別江卽此水也其水北至枳縣入江○方輿勝覽云涪江者自思州之上費溪發源經五十八節名灘方至黔州旣自黔州旣與施州江會流九十里經彭水武隆二縣凡五百餘里與蜀江會於州之東以其出於黔州又呼黔江亦名內江其水淵澄清澈可鑒毛髮底見苔石魚鰕可數○張祐送李長史歸涪州詩涪江江上客歲晚却還鄉暮過高唐雨秋經巫峽霜急灘船失次壘嶂樹無行好爲題新什知君思不常戴叔倫漸至涪州先寄

王員外使君縱詩。文教通夷俗。均輸問火田。江分巴字水。樹入夜郎烟。毒瘴含秋氣。陰崖蔽曙天。路難空計日。身老不由年。將命甯知遠。歸心詎可傳。星郎復何意。出守五溪邊。陸游詩。古壘西偏曉。繫舟倚闌搔首。思悠悠。欲營丹竈。竟無地。不見荔枝空遠遊。官道近江多亂石。人家避水半危樓。使君不用勤留客。瘴雨蠻烟我欲愁。○方輿云。黔江東岸有龜山。州治其上。元和志。舊州在岷江南。今州在涪江西。蜀漢涪陵太守龐肱。有惠政。輿地碑目。淳熙中。左綿任子宣過涪陵。於民家見漢隸石闕。上書漢涪陵太守龐肱闕。闕製如碑。○東渡高峯之上。與州治相對。爲石甕磧。方輿勝覽云。太守吳侯嘗遊石甕磧。遇一女織蓋步磧上。曰。吾父居此。瀕去解一玉環付廂吏。爲我謝使君。異日當歷顯任。子孫復守此州。言訖不見。按志。吳光輔爲涪守。後三十年。其孫仲復又守是邦。今吳公溪。吳公山。所爲得名也。○舊經云。吳君山一名鐵櫃山。橫亙江北。與涪陵縣相望。雄壓衆山。俯臨長江。屹立如櫃。相傳武侯屯兵於此。舊城猶存。○勝覽云。鐵櫃之南爲北巖。王真人修煉處也。紹聖丁丑。程伊川謫涪。卽普淨院。闢堂傳易。再閱歲。爲元符庚辰。乃徙夷陵。○碑目云。涪陵江北普淨院記。治平間。校書郎傅耆撰。北巖書院記。嘉定丁丑。簡池劉光祖撰。普淨院鉤深堂榜。別駕黃庭堅書。又有淳祐辛亥三月。旣望古綿。劉濟川三山林元。成都杜庭燮。三廬何清題名。又有汴陽吳克舒。以紹興癸未書雲。日舉家來遊。阱掾侍行。諸刻。○輿地紀勝云。開寶四年。黔南上言。江心石魚見。上有古記云。廣德元年二月。大江水退。石魚見。部民相傳豐稔之兆。按其處在近州鑿湖中。央石上刻雙魚。一銜蓂草。一銜蓮花。各三十六鱗。傍有石秤石斗。或十年。或三五年一出。唐大順元年。鵠

詩甚多。○方輿勝覽。州西一里白鶴灘。爾朱真人冲舉之處。志云。爾朱既浮江而下。漁人有白石者。舉網得之。擊磬方醒。遂於涪西灘前修煉。後乘白鶴仙去。因以名灘。○又云。爾朱先生種松山。在州東二里。種時松影映石。石皆有松紋。至今呼松屏石。採者禱於先生。乃得佳。不煩人力。自然成文。○華陽國志。延熙二年。馬忠定越嶲。置赤甲軍。常取涪陵之民。蜀丞相諸葛亮亦發勁卒三千人。爲連弩士。按志有赤甲戍。與黃草峽相近。在李渡之上。蘭市之下。杜甫詩云。黃草峽西鬆不歸。赤甲山下行人稀。卽此地也。○碑目云。許雄山有古廣漢縣令神道碑。俗呼爲誓虎碑。偶碑仆。遂有虎入城。縣官設祭。復豎碑。虎害乃止。按山在州西南七里。山之東有馬援壩。○志云。馬援壩在治南四里。伏波祠在治東十里。相傳將軍征武陵蠻。駐兵之處。寰宇記。涪陵江中有銅柱灘。最湓急。昔人維舟於此。見水底有銅柱云。○灘之東爲錦繡洲。九域志云。此洲人業織錦。闕也。宋翰詩。錦繡洲猶在。熊熊夢已無。文風齊兩蜀。仙洞接三都。白石從天設。青厓見地圖。荔枝妃子國。不復爨時輸。○方輿勝覽云。城西十五里有妃子園。其地多荔枝。昔楊妃所嗜。當時以馬遞馳載。七日七夜至京。人馬多斃於路。百姓苦之。故杜牧之過華清宮詩云。長安迴望繡成堆。山頂千門次第開。一騎紅塵妃子笑。無人知道荔枝來。○華陽國志。涪陵郡有丹興縣。以山出名丹也。蜀時省李特傳。范長生一名延久。又名九重。涪陵丹興人。按史記。巴寡婦清之先。得丹穴而擅其利。家富不貲。清能守其業。用財自衛。秦皇帝以爲貞婦。而爲築女清臺。括地志云。女清臺山。在永安城東北七十里。爲涪陵南平二郡界。

武隆縣

漢涪陵。枳二縣地。唐武德元年分涪陵縣立。以邑界武隆山爲名。本志云。枳縣故址在治東上流二十里。李膺益州記云。內江水自萬甯西北二百八十里至關頭灘。灘長百步。懸崖倒水。舟楫莫通。寰宇記云。內江一名涪陵江。一名巴江。在縣南。屈曲北流。又云。蜀江門灘在縣前。巴江水中。○志云。縣西一里古渡頭。有斷石中白痕如劍。光芒燭天。名爲天劍。又云。南二十里有信水。在峽口。其泉如沸。水與江等。日有三潮。每至則高尺餘。又云。龍寶潭在縣東北七十里。古箐淒其人鳥兩絕。杖藤而入。幽徑可十里。忽平沙廣野。曲壑清泉。別一世界。○四夷攷云。武隆之地。東隣黔楚。西接牂柯。北枕巴江。南通貴竹。又三而界土司爲酉陽之咽喉。石碇之頂臂。至若眞州。則撲胷之患矣。所謂難先全蜀險阨諸蠻者也。

彭水縣

史記秦司馬錯取楚商於之地。爲黔中郡。卽此。寰宇記云。卽劉璋之漢葭縣矣。隋開皇十三年。蠻帥內屬。故於此地設彭水。屬黔州。亦州之所理也。本志云。舊理在壺頭山之麓。今移於紹慶府基。按宋史太平興國八年。黔州摩圍山慶雲出。通判黃仲震圖頌以獻。中興小歷。理宗始追封爲紹慶府焉。○權載之黔州觀察使廳記云。黔中爲楚西南徼道。在漢爲武陵。莊躋循江以略地。唐蒙浮船以制越。舊經地近荆楚。候如巴蜀。五溪襟束。蠻蠻聚落。陰雨多晦。草木少凋。寰宇記云。五溪謂酉辰巫武沅等五溪。古老相傳。楚子城巴巴子兄弟五人流入五溪。各爲一溪之長。一說五溪蠻皆盤瓠子孫。自爲統長。故有五溪之號。古謂

之蠻蜚聚落也。三國志劉先主於五溪蠻之地置黔安郡。卽此地。樂史以爲郡後周設。誤矣。○劉長卿送任侍郎黔中充判官詩。不識黔中路。今看遣使臣。猿隨萬里客。鳥似五溪人。地遠官無法。山深俗易漚。須令荒徼外。亦解懼埋輪。司空曙送龐判官赴黔中詩云。天遠風雲異。西南見一方。亂山來蜀道。諸水出辰陽。堆案青油暮。看棋畫角長。論文誰可製。記室有何郎。李嘉祐送上官侍御赴黔中詩。莫向黔中路。令人到欲迷。水聲巫峽裏。山色夜郎西。樹隔朝雲合。猿窺曉日啼。南方饒翠羽。知爾飲清溪。許棠寄黔南李校書詩。從戎巫峽外。吟興更應多。郡響蠻江漲。山昏蜀雨過。公筵饒越味。俗土尙巴歌。中夜懷吳夢。知經灑灑波。顧非熊送皇甫司錄赴黔南幕詩。黔南從事客。祿利向來饒。官受外臺屈。家移一舸遙。夜猿聲不斷。寒木葉微凋。遠別因多感。新郎倍寂寥。杜荀鶴送人尉黔中詩。盤山行幾驛。水路復通巴。峽漲三川雪。園開四季花。公庭飛白鳥。官俸請丹砂。知尉黔中後。高吟采物華。許琳黔中書事詩。巴蜀水南偏。山窮塞壘寬。歲時將近臘。草樹未知寒。獨狖啼朝雨。羣牛向暮灘。更聞蠻俗近。烽火不艱難。竇羣黔中書懷詩。萬事非京國。千山擁麗譙。佩刀看日曬。賜馬傍江調。言語多重譯。壺觴每獨謠。沿流如著翅。不敢問歸橈。李頻黔中酬同院韋判官詩。平生同所爲。相遇偶然遲。各著青袍後。無歸白社期。江流來絕域。府地管諸夷。聖代都無事。從公且賦詩。○碑目云。漢故孝廉柳莊敏碑。在州廡內。字迹銷譌。唐黔南節度使趙國珍德政碑。上元二年立。在州南隔江。崔能神道碑。集古錄以爲長慶二年立。在州治山谷。刀筆云。宋左藏庫副使東南第八將秦世章。自長沙買石摹僧寶月古法帖十卷。載回黔安。壁之紹聖院。庭堅爲之跋。按世章秦

子明涪州人也。丹鉛錄謂寶月帖又在隋開皇帖。南唐昇元帖之前。比之金薄。賈紙銀錠。撮痕者。優劣當懸矣。○紀勝云。魯直謫居。有涪翁晚策杖至此。觀江漲。雨餘天欲涼。十五字墨蹟在州之嘉禾堂。又黔中與人帖云。庭堅頓首。竊觀鎮靜。足以安夷獠。清節足以服吏民。郡閣宴閑。時與僚佐歌舞。以謝江山。當亦無不樂時。別後未嘗不思英對也。齋中小宴。歌舞中更得新進否。此邦樂籍。似皆勝渝瀘。微有成都之風也。○本志載宋冉木震黔州倅衙月山巖銘云。黔號古郡。地居極邊。倅治倚山。其山刺天。有日月巖。古老相傳。視事累月。徧求茫然。偶濬溝渠。巨石中填。深掘視之。厥狀嶮峴。中竇一穴。透明而圓。皎如秋月。翳絕雲烟。旁補三隙。如星之聯。杖拭細觀。古識存焉。善命僕夫。挽置座前。負以層石。映以灣泉。日對其側。卷舒簡編。凡物遭遇。皆有夤緣。高岸深谷。知幾變遷。惟我月巖。存千萬年。又飛來峯銘云。黔山角逐。雲空相摩。疊石其間。如戟如戈。否則蹲伏。橫立攢阿。千狀萬怪。知名幾何。惟飛來峯。涪翁相遭。有筆如椽。三字袞袞。一經品題。聲價倍高。譬如人乎。何地無材。不遇知音。均混草萊。有送吹噓。清冥路開。一飛冲天。迴絕塵埃。噫歎玆石。千古皚皚。四維整植。如出剪裁。日炙雨澆。蒼然生苔。不動惟汝。何從飛來。因涪翁重。汝何能哉。○志云。綠陰軒在治南一里。石軒下平曠。可容十數人。黃魯直過此。手書綠陰軒三字。鐫於石壁。至元年紹慶總管向午鳳重修。有臥佛巖。與綠陰軒相近。巖石欹懸。生一竅甚圓。仰窺之。又生一竅。其中虛明。有橫石一塊。眉目宛然。如來佛曲肱枕臥時也。○紀勝云。西南過江五里。有摩圍山。夷獠呼天爲圍。以其高摩於天也。道家謂之洞天福地。昔有樵者攀緣入洞。見二老圍棋。其中回復尋之。了不可得。魯直安置黔

中寓開元寺。號摩園。老人有石泉在山顶。山勢壁立。泉從石竇中流出。寺僧以甕接之。爲朝夕清供。碑目載摩園山。唐人石刻云。巴黔路途闊遠。亦無館舍。凡至宿泊。多倚溪岳。就水造食。鑽木出火。山谷集云。丙子仲秋。黔守席上客有舉杜少陵中秋詩曰。今夜鄜州月。閨中只獨看。遙憐小兒女。未解憶長安。因戲作詞云。舉頭無語。家在月明生處住。擬上摩園。最上峯頭試望之。偏憐鍾秀。苦淡同甘。誰更有想見牽衣。月到愁邊總未知。又丙子仲秋。奉陪黔陽曹使君伯達。翫月作減字木蘭花。兼簡施州張使君仲謀云。中秋多雨。常是罽罽狼籍去。今夜雲開。須道姮娥得得來。不知雲外。還有清光同此會。笛在層樓。聲徹摩園頂上頭。○九州要記云。黔州有彭水。在信甯縣。卽古之黔中。地志云。唐長孫無忌。墓在信甯西岸岐山之麓。按史無忌。洛陽人。累官太子少傅。同中書門下三品。高宗時。諫立武后。許敬宗誣奏無忌反。削其官爵。謫黔州安置。沒葬。是鄉。居人歲以三月三日致祭云。

黔江縣

隋之石城縣也。志云。城東二十五里爲舊縣矣。又云。歌羅驛在治東百九十里。黃魯直竹枝歌七首題於驛壁。其一云。浮雲一百八盤纜。日落四十九渡明。鬼門關外莫言遠。四海一家皆弟兄。志云。四十八渡水在治西二十里。發源柵山溪。水折流四十八灣。夾於兩岸之間。春月百花飄落。隨水可愛。又云。治西五十里。峭壁中有木櫃。人迹不到。曰櫃子厓。在四十八渡之中。李頻泛黔江詩。野梅將雪競。江月與沙寒。卽此水也。

忠州

譙周三巴記曰。臨江縣。後漢初平六年立。在永甯郡東四百里。臨江南古城。○水經曰。江水又東。逕臨江縣南。註謂王莽之鹽江縣也。郡國志云。梁於此立臨江郡。隋置臨州。貞觀始改爲忠州。忠之名以巴蔓子。或云嚴顏。按華陽國志。周之季世。巴國有亂。將軍蔓子請師於楚。許以三城。楚王救巴。巴國旣甯。楚使請城。蔓子曰。藉楚之靈。克弭禍難。誠許楚王城。將吾頭往謝之。城不可得也。乃自刎。以頭授楚使。楚王歎曰。使吾得臣若巴蔓子。用城何爲。乃以上卿禮葬其頭。巴國葬其身亦以上卿禮。今治西北一里有蔓子冢。○三國志。劉璋使嚴顏守巴郡。爲張飛所擒。欲降之。顏曰。有斬頭將軍。無降將軍。飛怒。命斬之。顏從容曰。斫頭便斫頭。何必怒耶。今臨江縣西南二十里有嚴太守碑及祠。蘇軾詩云。先主反劉璋。兵意頗不義。孔明古豪傑。何以爲此事。劉璋庸主。誰爲死不二。顏子獨何賢。談笑傲碓几。國亡君已執。嗟子死誰爲。何人刻山石。使我空涕淚。蘇轍詩云。古碑殘缺不可讀。遠人愛惜未思磨。相傳昔者嚴太守。刻石千歲字已譌。嚴顏平生吾不記。獨憶城破節最高。被擒不辱古亦有。吾愛善折張飛豪。軍中生死何足怪。乘勝使氣可若何。斫頭徐死子無怒。我豈畏死如兒曹。匹夫受戮或不避。所重壯氣吞黃河。臨危閒暇有如此。覽碑慷慨思橫戈。自註云。碑在忠州。本志。州西五十里江中高阜。名塘土洲。有嚴顏墓碑及祠。○九域志云。臨江郡有古屈原碑。王象之碑目亦引之。東坡謂屈原古塔在忠州。不當有此意者。後人追思爲之。其詩曰。楚人悲屈原。千歲意未歇。精魂飄何處。父老空哽咽。至今滄江上。投飯救飢渴。遺風成競渡。猿叫楚山裂。

屈原古壯士。就死意甚烈。世俗安得知。眷眷不忍決。南賓舊屬楚。山上有遺塔。陸游詩云。我遊南賓春暮時。蜀船曾繫掛猿枝。雲迷江岸屈原塔。花落空山夏禹祠。塔在江之南岸。○紹聖四年。王闢之知忠州。建四賢閣於治後。四賢者。故相司徒鄭州刺史南華劉晏。士安。故相贈兵部尚書嘉興陸贄。敬輿。中書侍郎平章事贈司徒安邑李吉甫。宏憲。刑部尚書致仕贈右僕射下邳白居易。樂天。皆有像設。今移在學宮。○輿地碑目云。忠州學宮有漢江原君石闕。闕上延熹等二十七字。可揭。自州西十五里移來者。又有晉王右軍半月橋帖經。涪翁題跋。○又云。州治有漢建初中修道碑。字已漫滅。餘建初等十二字。可辨。治內議道堂有唐率更柘漿帖碑。太守王聖涂購自臨江農民瞿氏。命男宗摹刻。紹聖四年七月二十四日。後有山谷題跋。○又云。州儀門下有漢延熹嚴孝子碑。按華陽國志。元初中貢孝子嚴永。卽此碑矣。字已漫蝕。餘延熹二年等八十餘字。自城西二十里移來者。○文苑英華。唐蘇頌有授忠州刺史。上騎都尉王守廉制。陳子昂有忠州江亭喜遇吳參軍見牛司倉序。略云。江亭迴瞰。羅雜樹於階基。山榭遙臨。列羣峯於戶牖。丹藤綠篠。俯映長筵。翠渚洪瀾。交流合坐者矣。杜甫宴忠州使君姪宅詩。出守吾家姪。殊方此日歡。自須遊阮舍。不是怕胡灘。樂取長歌送。杯饒旅思寬。昔曾如意舞。牽牽強爲看。李端送濮陽錄事赴忠州詩。成名不逐雙旌遠。空印還爲一郡雄。赤葉黃花隨野岸。青山白水映江楓。巴人夜語孤舟裏。越鳥春啼萬壑中。聞說古書多未校。肯令才子久西東。白居易郡中春讌。因贈諸客詩。僕本儒家子。待詔金馬門。塵忝親近地。孤負聖明恩。一旦奉優詔。萬里牧遠人。可憐烏夷帥。自稱爲使君。身騎牂柯馬。口食巴江鱗。暗淡

緋衫故爛斑。白髮新。是時歲一月。玉歷布春分。頰條足皇澤。命宴及良辰。冉冉趨府吏。蚩蚩聚州民。有如蟄蟲鳥。亦應天地春。薰草席鋪座。藤枝酒注樽。中庭無平地。高下隨所陳。蠻鼓聲坎坎。巴女舞蹲蹲。使君居上頭。掩口語衆賓。勿笑風俗陋。勿欺官府貧。蜂巢與蟻穴。隨分有君臣。○樂天刺史茲邦。風流暇豫。日事遊賞。其踪跡最著者。有東樓。荔枝樓。鳴玉溪。龍昌寺。巴子臺。東坡。東澗。諸勝。黃魯直爲王聖涂作記云。樂天東樓以燕賓。佐西樓以瞰鳴玉溪。登龍昌上寺。以望江南諸山。張樂巴子臺。以會竹枝歌女。東坡種花。東澗種柳。皆相傳誡其舊處焉。○東樓。卽城東樓也。白公東樓詩云。山東邑居窄。峽牽氣候偏。林巒少平地。霧雨多陰天。隱隱煮鹽火。漠漠燒畝烟。賴此東樓夕。風月時翛然。憑軒望所思。目斷心情悵。又東樓竹詩云。瀟瀟城東樓。遶之多修竹。森然一萬竿。白粉封青玉。捲簾睡初覺。欹枕看未足。影轉色入樓。牀席生浮綠。空城絕賓客。向夕彌幽獨。樓上夜不歸。此君留我宿。○荔枝樓在治西南隅。卽西樓也。公旣作荔枝圖以寄親友。又建樓以賞之。其詩曰。鄉路音信斷。山城日月遲。欲知州近遠。階前摘荔枝。又西樓詩云。悄悄復悄悄。城隅隱林梢。山郭燈火稀。峽天星漢渺。年光東流水。生計南枝鳥。月沒江沈沈。西樓殊未曉。○寰宇記云。鳴玉溪在州西十里。上有懸巖瀑布。高五十餘丈。潭洞幽邃。古木蒼然。前刺史房式嘉其幽絕。特置蘭若。凡有五橋以渡。長慶集云。鳴玉溪上。木蓮穠茂。元和十四年夏。命道士母丘元志寫之。本志云。溪在治西二里。發源西厓水。聲如珮玉。其傍有古刻。亦名西溪。又云。西北五里有木蓮洞。宋錢求之詩云。鳴玉溪邊堪寓目。木蓮洞下更關情。忠州好景無人說。祇得孤城小市名。今治內有木蓮樓。相沿其名。

非故處也。○龍昌有上寺。下寺俱唐建。在西山頂者爲上寺。卽巴臺寺也。與翠屏山相對。故云可以望江南。志謂之巴子臺。巴子所築也。唐宋詩刻存焉。下寺卽治平寺。寰宇記曰。龍昌寺在臨江縣東。今爲治平寺。白公嘗於寺旁植柳。柳盛則寺興。柳衰則寺廢。寺僧愛此柳。比之甘棠。○白傅登城東古臺詩。迢迢東郊上。有土青崔嵬。不知何代物。疑是巴王臺。巴歌久無聲。巴宮沒黃埃。志云。巴王廟在州東一里。神卽蔓子將軍也。歲三月七日。太守以豕帛致祭。先期土人具千鈞蠟祠之。宋爲永順祠。今爲忠貞祠。○王象之碑目云。漢丁房雙石闕。在巴王廟前。按左闕高可二丈。覆以飛甍。層觀最上。琢雙扉。一美人現半身。倚立中層。琢車馬人物。旁刻文螭。糾蟠長可三四尺。金石古文云。此漢畫之始也。正面漢隸十行。行三十字。強半剝落。惟漢都尉丁房五字。相聯可讀。它無恙者尙三二十字。闕陰鐫云。紹聖丁丑五月戊午。知忠州軍州事齊國王闕之。軍事推官荆南李鑒。兵馬監押雒陽田缺。巡檢安化楊中孝。監稅濟南蓋犧逸。錄事高陽張復。臨江縣令竟陵張微。司戶參軍陽安文同。司理參軍雲安常彥。臨江縣主簿東武缺同遊。永順王祠。坐東軒。而巴峽臨岷江。望東溪之龍潭。崇山峻嶺。激湍清流。真山陰之蘭亭也。於是賦詩酌酒。極一時適。將歸。共觀石闕之上。讀漢都尉丁房碑。欲重加刊刻。而文字磨滅。竟不可辨。相與嘆息而去。右邊闕就圮。近日爲有司者新之。了非故物。○巴臺下江中有石圓光如鏡。旁有五石筍簇之。呼爲仙人照鏡臺。○勝覽云。東坡在南賓郡圃。有亭名東亭。白公詩。綠樹爲閑客。紅蕉當美人。又何處慙重回首。東坡桃李種新成。又最憶東坡紅爛熳。野桃山杏水林檎。蘇子瞻東坡之號。實始於此。其詩云。平生自覺出處老大。

粗似樂天。非東坡之名。偶余同也。○志云。東澗在治西開元寺側。亦樂天時鑿。公有東澗種柳詩云。野性愛栽植。植柳水中坻。三年未離郡。可以見依依。○水經曰。江水又逕虎鬚灘。灘水廣大。夏斷行旅。今州西二里有石梁三十餘丈。橫截江中。俗呼倒鬚灘。卽其處。○輿地碑目。塘土洲有貞元十七年段文昌撰者。老思舊碑。有唐刺史房公式善狀。碑志云。塘土洲在治西五十里。有景德寺善狀碑。立在普甯院中。○水經曰。江水又東。得黃華水口。左逕石城南。志云。卽皇華洲。在東五十里。江浦週迴可二十里。碑目云。有宋忠州貢院碑。參軍安元自立。金魚堡碑。陸忠州爲咸淳府碑。俱在此洲上。咸淳碑詔文。勅門下。皇天畀付有家。敢怠繼承之敬。乾元首出。庶物聿懷。潛躍之初。念聖考之貽謀。擇价藩而錫履。嚴陵龍水之鎮。受節齋壇。永嘉忠南之封。分茅主社。騰言屏翰之重。允協謳歌之歸。漢輿地之上圖。若規先憲。周舊邦之新命。並錫府名。以壯萬年之觀。亦尙一人之慶。其改陸溫州爲瑞安府。嚴州爲建德府。宣州爲慶遠府。忠州爲咸淳府。咸淳元年八月二十九日午時。急速。按寰宇記。石城在臨江縣東百里。岷江之北岸。李雄之亂。巴西郡寄理於此。城四面懸絕。亦謂之巴子城矣。○華陽記曰。臨江縣有鹽官。在監涂二溪。一郡所仰。按涂溪在州東八十里。發源蟠龍洞。來經涂井。井神爲漢楊伯起。井廟碑云。神嘗刺史荊州。迺江至此。憩於南城寺。謂人曰。江北二三里間。安得有寶氣耶。至蟠龍洞。見周柱下史丹爐。曰。此地有龍無虎。宜其丹不就也。至涂山。見白鹿飲泉。曰。寶氣在此矣。土人從所指處。鑿磐石。而得鹽泉。廟在治東一里。志云。東南八十里。方斗山。以形名也。山有龍洞。其神號方斗龍王。所謂涂山與蟠龍洞者。此是。又云。東二十里香爐堆北。

有石碑云。處士楊佐墓。漢楊伯起之裔孫。○南山。卽翠屏也。在對岸二里。山中有禹廟。陸宣公墓。玉虛觀。朝真洞。望夫臺。仙履迹。諸勝。白傅作樓以望之。其詩云。江上新樓名四望。東西南北水茫茫。又有望南山。寄行簡詩。臨江一嶂白雲間。紅綠層層錦繡斑。不作巴南天外意。何如昭應望驪山。○輿地碑目。禹廟有唐碑。字畫漫滅。不可讀。宋碑乃張俞作。杜甫詩云。禹廟空山裏。秋風落日斜。荒庭垂橘柚。古屋畫龍蛇。雲氣噓青壁。江聲走白沙。早知乘四載。疏鑿控三巴。度禹廟。緣山行。可里許。爲玉虛觀。輿地碑目云。玉虛觀有唐人修建碑。四方輿勝覽云。玉虛觀南三十步。有陸宣公墓。舊經陸宣公贊。藁葬於此。或曰宣公已歸葬。橋李忠南特虛冢耳。然子美已歸葬。偃師而未陽之墓。自若太白已移殯青山。而采石之冢猶在。則敬輿此墓宜封殖之矣。玉虛亦名紫極觀。○通志云。忠州南十里有望夫臺。未詳其事。按東坡忠州望夫臺詩云。山頭孤石遠亭亭。江轉船回似石屏。可憐千古長如昨。船去船來自不停。浩浩長江赴滄海。紛紛過客似浮萍。誰能坐待山月出。照見寒影高伶俜。○本志。仙履跡石在治北八十里。相傳昔有真人立此飛昇。今足跡尙存。宋秦東詩。仙人雙赤脚。踏石如踏泥。泥痕尙可沒。石痕不可迷。○杜甫管居龍興寺。有題院壁詩云。忠州三峽內。井邑聚雲根。小市常爭米。孤城早閉門。空看過客泪。莫覓主人恩。淹泊仍愁虎。深居賴獨園。陸游龍興寺弔少陵寓居詩。中原草草失承平。戍火胡塵到兩京。扈蹕老臣身萬里。天寒來此聽江聲。註云。寺門外江聲甚壯。在州北八十里。又二十里有拔山寺。與龍興寺俱。漢永平間建。宋馮時行寶華寺詩。宿雨初收草木濃。羣鴉飛去法堂空。長廊無事僧歸晚。盡日門前只看松。卽漢之普明寺也。已

上三寺志云。在州北九十里。○志云。東北三十里大成寺。漢初平建。西北四十里寶珠寺。晉永和建。西北百里雙龍寺。唐貞元建。張詠雙龍寺詩。未踏關陽已見山。木鯨時吼翠微間。老僧隨隊看雲起。居士忘緣共鶴閒。入眼烟光依砌濕。倚空霧氣遶山環。三朝寶訓神明護。大讀經章祝玉顏。

酆都縣

水經曰。江水又逕東望峽。東歷平都。註謂峽對豐民洲。舊巴子別都也。華陽國志。巴子雖都江州。或治平都。卽此。續漢書。永元二年。分枳置平都。取界內平都山爲名。○方輿勝覽云。自酆都縣東行二里許。始登山。石徑縈迴。可一。二里。平塋如掃。林木邃茂。夾逕翠柏黃葛。殆萬株。有數十株。是千年物。此卽平都山也。○酆道元曰。平都有天師治。兼建佛寺。甚清靈。道書號爲平都福地。輿地紀勝云。仙都觀在平都山。唐建。宋改景德。又名白鶴觀。有陰長生詩。天成四年書也。通攷云。陰真人祠刻詩三章。乃貞元中刺史李貽孫書。元豐四年。轉運判官許安世過祠下。閱石定爲陰仙之作。乃屬知夔州吳師孟書石。送置觀中。詩見神仙記。○百川學海云。治平末。蘇東坡泝峽泊舟仙都山下。道士持陰長生石本金丹訣。就質真贗。東坡答曰。不知也。然士大夫過此。必以請。久久自有知之者。按古今詩謠云。蜀道觀中渌井得。一碑。其文曰。有物有物。可大可久。採乎蠶食之前。用乎火化之後。成湯自上而臨下。夸父虛中而見受。氣應朝光。功參夜漏。白英聚而雪慚。黃酥凝而金醜。轉制不已。神趨鬼驟。金歟玉歟。天年上壽。無著於文。訣之在口。此卽陰仙所著丹訣也。○勝覽云。陰長生以延光元年於平都山白日昇。天山頂五雲洞中。嘗有雲氣從丹井中出。

洞有五雲樓。壁上瑤池樂部四字。段文昌書。○輿地碑目云。仙都觀有二仙公碑。李虔撰。二仙銘。薛湜撰。俱景雲二年立。陰真人影堂碑。王真人碑。俱李吉甫撰。貞元年立。其石瑩潤而白。號爲玉石碑。又有商比千銅盤銘。開元間掘。自偃師縣翻刻於此。文曰。右林左泉。後岡前道。萬世之銘。茲焉是寶。又有中和元年忠州刺史陳侁三官碑。丞相段文昌修觀碑。段少監修齋記。天尊石像記。老君石像記。張大理詩。杜光庭石函記。按今皆不存。○志云。總真羣仙之府。道山洞天等刻。或隸篆。或真行。大徑尺。呂純陽書。見存。純陽登平都有訪仙詩云。孟蘭清曉過平都。天下名山總不如。兩口單行誰解識。王陰空使馬蹄虛。又云。一鳴白鳥出青城。再謁王陰二友人。口口惟言三鳥樂。擡眸已過洞庭春。宋蘇軾詩。足躡平都古洞天。此身不覺到雲間。擡眸四顧乾坤闊。日月星辰任我攀。又平都天下古名山。自信山中歲月閑。午夢任隨鳩喚覺。早朝又聽鹿催班。蘇轍詩。山前江水流浩浩。山上蒼蒼松柏老。舟中去客日紛紛。古今換易如秋草。空山樓觀何崢嶸。真人王遠陰長生。飛符御氣朝百靈。悟道不復誦黃庭。龍車虎駕下來迎。去如旋風轉紫清。真人厭世不回顧。世間生死如朝暮。學仙度世豈無人。殮霞絕粒常辛苦。安得獨從逍遙君。冷然乘風駕浮雲。超世無有我。獨行。范成大詩云。神仙得者王方平。誰其繼之陰長生。飄然空飛五雲幘。上賓寥陽留玉京。石爐丹氣常夜明。寵光萬柏森千齡。峽山偏仄岷江滎。洞宮福地古所銘。云有北陰神帝庭。太陰黑簿囚鬼靈。自從仙都啓巖扃。高霞流電飛伏精。暉景下墮燦九水。塞絕苦道升無形。至今臺殿棲岑岬。隋坊唐堊留丹青。十仙怪寄溪如清。瑤池仙仗紛娉婷。琅玕赴節鱗欲鳴。我來秋暑如炊蒸。汗流吁氣扶枯

藤摩挲衆蹟不暇評。聊記梗槩知吾曾。○段文昌修平都觀記云。平都山最高頂。卽漢時王陰二真人蟬蛻之所也。峭壁千仞。下臨湍波。老柏萬株。上插峯嶺。靈花綵羽。皆非岡志中所載者。昏旦萬狀。信非人境。貞元十五年。余西遊岷蜀。停舟江岸。振衣虔潔。詣諸洞所。石昂靈竇。蒼然相次。苔龕古書。依稀可辨。時與道侶數人。坐於下。須臾。天籟不起。萬竅風息。山光耀於耳目。烟霞拂於襟袖。相顧神竦。若在紫府元圃矣。牽於行役。不得淹久。瞻眺惆悵。書名而去。邇來已三十四年。太和庚戌歲。自淮南移鎮荆門。有客山峽中來者。皆言當時題記文字。猶在觀宇。歲久臺殿荒毀。不三數年。必盡摧沒於巖壑矣。乃捨一月秩俸。俾令修葺。子來同力。浹旬報就。去年冬十一月。詔命換麾幢。再領全蜀。泝三峽。歷舊遊。依然景物。重喜登覽。聞泉聲而緩步。愛松色而難別。遂命筆硯。志於巖谷。時太和七年正月五日。○道經云。老子騎青牛度函谷。將息駕於平都。今縣二里有青牛山。在平都之左。○方輿勝覽云。景德觀前。鹿麕時出。沒林間。與人狎。志云。自平都西去一里。林樹叢密者。白鹿山也。霏雪錄云。蘇老泉將遊仙都觀。知縣李長官云。故知君之將至也。問何以知之。曰。此山巨鹿鳴。輒有客至。屢驗。輒未一失。老泉亦嘗爲人言之。東坡白鹿山詩云。日月何促促。塵世苦拘束。仙子去無踪。故山遺白鹿。仙人已去鹿無家。孤悽悵望曾城霞。至今聞有遊仙客。夜來江浦叫平沙。長松千樹聲蕭瑟。仙客去人無咫尺。夜鳴白鹿安在哉。滿山秋草無踪跡。山之翠微有玉鳴。泉響作琴音。清澄玉色。其麓有流杯溪。溪凡七出。相傳平都之仙常燕集於此。○華陽國志。巴子又立市於龜亭北岸。今新市里是也。註水經曰。平都縣有市肆。四日一會。東坡詩。我生飄蕩去何求。再過龜城。

歲五周身行萬里。半天下僧臥一菴。初白頭。題云過石龜山作也。舊志石龜山在縣東五十里。其下有村墟。○志云縣在豐民洲。登平都山。望岷江西來。繞之而去。其支流派別。名爲溪者。可得而數焉。稂溪在治東。山上有魏國夫人墓。未詳年代。葫蘆溪在西南。遂窺莫測。蛟龍是宅。青螺綠髻。上下相映。志謂之月鏡潭也。碑溪以古碑名。不知何代物。去縣稍遠。望途溪在古南賓縣地。今爲南賓里。舊屬忠州。鄰石碛司。○志又云龍渠縣。今名縣壩。屬散毛宣撫司。縣有引藤山。出藤大如指。可以吸酒。白樂天詩。閑拈蕉葉題詩句。悶折藤枝引酒嘗。亦近南賓界。○恐按豐民洲在平都山下。隋兩取之。以名縣。自豐旁加邑。而羅鄴地府之說始行。今引真誥。廣記二文附此。真誥曰。羅鄴山在北方癸地。註此癸地。未必以六合言。當是於中國。指向正在幽州遼東之北。北海之中。去岸不知幾千萬里。又曰。六天宮。是鬼神六天之治也。洞中六天宮。亦同名。相像如一。世有知鄴都六天宮門名。則百鬼不敢爲害。陶宏景曰。此應是北鄴鬼王。決數罪人住處。其神卽經所稱閻羅王矣。太平廣記曰。東都豐都市。在長壽寺之東北。初築市垣。掘得古冢。土藏無磚甃。棺木陳朽。觸之便散。屍上著平上幘。朱衣得銘曰。筮道居朝。龜言近市。五百年間。於斯見矣。當時達者。參驗是魏。黃初二年所葬也。然范成大詩云。有北陰神帝庭。太陰黑簿囚鬼靈。則鄴都之說。亦不起於近代。

墊江縣

唐通典曰。魏恭帝始置忠州墊江縣。後周改名魏安。隋開皇十八年。復爲墊江。蔡松年南史補曰。漢之墊

江今之合州也。合州置自西魏。及隋煬帝改合州爲涪陵郡。於是移墊江之名於桂溪縣。桂溪溪旁多桂樹也。縣以樹名。寰宇記曰。桂溪縣有清水。有容水在桂溪南三里。清水唐縣名。猶開州之清濁二水矣。縣又有鹽溪。今治北小溪上有古碑。乃宋淳熙中物。○孟康註地理志曰。墊江之墊音重疊之疊。晉太康地記曰。墊江因李雄之亂。移置於陽關。陽關未詳。疑卽陽關爲三關之一。○碑曰。會仙洞。榜在治東四十里之鳳凰山。李太白書。羅王洞。榜在治北五十里之西山。李唐勅賜也。按西山盤石上有巨人迹。或羅王榜之始名。○志云。東北二十里有古寺。曰秋月禪關。唐馬祖修淨之所。卽峯頂山也。又二十里有古洞。飛湍喧豨如雷。聲聞十餘里。久晴聞之則雨。久雨聞之則晴。○段氏遊蜀記曰。忠州墊江縣。以蘇薰爲席。絲爲經。其色深碧。○渝志云。明玉珍僭號。以墊江爲鷄鵝食邑。亦猶巴子以東突碛爲畜牧沮矣。

蜀中名勝記卷之二十

遵義道

遵義府遵義縣附郭

漢書唐蒙上書說武帝曰。竊聞夜郎國。所有精兵。可得十萬。浮船牂柯。出其不意。此制越一奇也。上乃拜蒙爲中郎將。從巴笮關入。見夜郎侯。厚賜。諭以威德。約爲置吏。夜郎傍小邑。皆貪漢繒帛。以爲漢道險。終不能有也。迺且聽蒙約。還報。乃以爲犍爲郡。發巴蜀卒治道。自犍道指牂柯江。司馬相如又往諭。意皆不能命。數反叛。及南越反。上使馳義侯同犍爲發南夷兵。且蘭君乃反。殺使者。會越已破。引兵誅且蘭。遂平南夷。○唐書云。天下山河之象在乎兩戒。南戒自岷山。迤邐及北地上郡。西南至巴蜀。漢中東及牂柯。今遵義之區。雖四塞爲固。而襟帶之脈。則牂柯江水矣。○郡志云。碧雲峯在治西。四峯並峙。中央迥出。青碧如雲。按神君張亞播州玉皇碑云。城西碧雲峯下。公府西北隅。夷衍清勝。隱然神仙窟宅。○志又云。城外桃源洞。石乳天垂。見者眩目。沈德元詩云。亭跨桃源石。溪山真美哉。笑同今日上。醉去幾時來。環野誰堪據。寸心當自裁。丈人千古意。倚望一銜杯。後人因立美哉亭。○四夷傳。宋濬熙中。遷遵義軍於穆家川。志云。穆家川源出龍巖山。流經湘山。一名湘川。李白詩云。洛陽才子謫湘川。元禮同舟月下仙。記得長安還一笑。不知何處是西天。白詩又云。石筍如掉筆。懸於山之巔。誰謂不平者。與之書青天。志云。今樓山關石

筓參天。是白題詩處也。○志云海龍園爲楊會穴壘。在治北三十里。四面斗絕。後有側徑。略一線。今居人尙不知通於何所。故老相傳。昔白龍太子據此。今爲白龍寺。又城外福光寺。有銅佛像。初人見之。荒莽中。欲取者數。風雷輒作。不敢近。有異僧率土人齋戒。乃得。今在寺中。又有龍山鐘黑達樹。皆異物也。播平鐘爲水西持去。樹猶存。○志又云。城北門有廖孝廉故宅。城東郭有二冉故宅。司北有苗齋郎故宅。按齋郎太廟執事之官也。人代未詳。寰宇記謂齋郎水源出蒿芰里。楚米陂。經小溪里入瀘江。本此。二冉宋末播州名士。冉璉冉璞也。有文武才。前後辟召皆不赴。余玠安撫四川。築招賢館。兄弟往謁。玠與分庭抗禮。久無所試。使人窺之。惟相對據地。以墨畫地爲山川城池狀。因獻城釣魚山之策者。廖孝廉事不可考。○寰宇記云。貞觀九年。分牂柯北界。置郎州。領恭水。高山。貢山。柯盆。耶施。釋鷲六縣。十一年省。十三年。又於其地置播州。取播川爲名。仍復六縣。其明年改恭水爲羅蒙縣。高山爲舍月縣。貢山爲胡江縣。柯盆爲帶水縣。耶施爲羅爲縣。釋鷲爲胡刀縣。十六年。又改羅蒙爲遵義縣。二十年。以夷州之芙蓉。瑯川二縣來屬。顯慶五年。廢舍月。胡江。羅爲三縣。景龍三年。陞播州爲都督府。先天二年。罷。天保元年。改爲播川郡。乾元元年。復爲播州。○寰宇又云。舍陵山在遵義縣東四十五里。夷牢水。西自帶水縣來。東流經縣北一里。又屈曲南流。入廢胡刀縣界。帶水源出舊縣西大山。東流經帶水縣城北。又東流至廢胡刀界。注胡江水。按唐永徽中。廢帶水縣在府北三十里。宋大觀建。遵義軍於白綿堡。亦在府北三十里。似同一地。○隋楊素贈薛播州詩。凡十四首。卽薛道衡也。汾陰人。少孤。專精好學。甚著才名。隋高祖除爲內史。累遷上儀同。其爲

播州疑在煬帝之世。詩云：在昔天地閉，品物屬屯蒙。和平替王道，哀怨結人風。麟傷世已季，龍戰道將窮。亂海飛羣水，貫日引長虹。干戈異革命，揖讓非至公。又：兩河定寶鼎，八水域神州。函關絕無路，京洛化爲丘。漳滏爾連沼，涇渭余別流。年郊滿戎馬，涉路起風牛。班荆疑莫遇，贈綺竟無由。又：五緯連珠聚，千載濁河清。金亡潛虎質，閩盡自蛙聲。聖期伊旦暮，天祿啓炎精。霧生三日重，星飛五老輕。禋宗答上帝，改物創羣生。又道昏雖已明，政故猶未新。刳舟洹水際，結網大川濱。出遊迎釣叟，入夢訪幽人。植林雖各樹，開榮豈異春。相逢一時泰，共幸百年身。又有帛賁丘園，生芻自幽谷。塵芳金馬路，瀾清鳳池澳。零露旣垂光，清風復流穆。傾蓋如舊知，彈冠豈新沐。利心金各斷，芬言蘭共馥。又：自余歷端揆，緝熙惡時彥。及爾陪帷幄，出納先天睇。高調發清音，緝藻流餘絢。或如彼金玉，歲暮無凋變。余松待爾心，爾筠留我箭。又：荏苒積歲時，契闊同遊處。閭闔旣趨朝，承明還宴語。上林陪羽獵，甘泉侍清曙。迎風含暑氣，飛雨淒寒序。相顧惜光陰，留情共延佇。又：滔滔彼江漢，實爲南國紀。史牧求明德，若人應斯美。高臥未褰帷，飛聲已千里。還望白雲天，日暮秋風起。峴山君儻遊，淚落應無已。又：漢陰政已成，嶺表人猶蠹。借寇比方新，還珠總如故。楚人結去思，越俗歌來暮。陽烏尙歸飛，別鶴還迴顧。君見南枝巢，應思北風路。又：北風吹故林，秋聲不可聽。雁飛窮海寒，鶴唳霜皋淨。含毫心未傳，聞音路猶曠。唯有孤城月，徘徊獨臨映。弔影余自憐，安知我疲病。又：養病願歸閑，居榮在知足。棲遲茂陵下，優游滄海曲。古人情可見，今人遵路躅。荒居接野窮，心物俱非俗。桂樹方叢生，山幽竟何欲。又：所欲棲一枝，稟分豐諸已。園樹避鳴蟬，山梁遇時雉。野陰冒叢灌，幽氣含蘭

芷悲哉暮秋別春草復萎矣。鳴琴久不聞。屬聽空流水。又秋水魚遊日。春樹鳥鳴時。濠梁莫共往。幽谷有相思。千里悲無怨。一見杳難期。山阿散瓊藥。庭樹下丹滋。物華不相待。遲暮有餘悲。又銜杯向南浦。寒色黯沈沈。風起洞庭險。煙生雲夢深。獨飛時慕侶。寡和乍孤音。木落悲時暮。時暮感離心。離心多苦調。詎假雍門琴。○唐韓愈作柳宗元墓誌略云。初子厚自柳州召至京師。而復爲刺史也。中山劉夢得禹錫亦在遣中。當詣播州。子厚泣曰。播州非人所居。而夢得親在堂。吾不忍夢得之窮。無辭以白其大人。且萬無母子俱往理。請於朝。將拜疏。願以柳易播。雖重得罪。死不恨。遇有以夢得事白上者。夢得於是改刺連州。嗚呼。士窮乃見節義。今夫平居里巷。相慕悅。酒食遊戲。相徵逐。詡詡強笑語。以相取。下握手。出肝肺。相示。指天日。涕泣誓生死。不相背負。真若可信。一旦臨小利害。僅如毛髮。比反眼。若不相識。落陷穽。不一引手救。反擠之。又下石焉者。皆是也。此宜禽獸夷狄所不忍爲。而其人自視以爲得計。聞子厚之風。亦可以少愧矣。

桐梓縣

華陽國志夜郎郡古夜郎國也。屬縣二千戶。治夜郎縣。有遼水通廣鬱林。有竹王三郎祠。甚靈響。劉敬叔異苑云。漢武帝時。夜郎竹王神者。名興。初有女子浣於豚水。見三節大竹流入足間。推之不去。聞其中有號聲。持破之。得一男兒。及長。有才武。遂雄夷獠氏。自立爲夜郎侯。以竹爲姓。所破之竹。棄於野。卽生成林。王嘗與從人止石上。命作羹。從人曰。無水。王以劍擊石。泉便湧出。今竹王水及破竹成林。並存。○後漢使

唐蒙開牂柯郡。斬竹王首。夷獠咸訴以竹王非血氣所生。甚重之。求爲立後。太守吳霸以聞。帝封三子爲侯。死配食父廟。今夜郎縣有竹王三郎祠。是其神也。本志云。夜郎里有竹王洞。是其故處。○九州要記云。夜郎自古非臣服州郡之地。昔漢武帝開拓南邊。始置夜郎縣。○後漢書曰。夜郎者。臨牂柯江。江廣百餘步。足以行船。唐家發巴蜀卒治道。自犍道抵牂柯江。卽此地。十三州志云。牂柯者。江中山名。晉永嘉二年。分牂柯置夜郎郡。兼置充州。寰宇記。唐武德二年。以梓潼縣爲充州。開元十五年。改爲夜郎縣。又云。充州故夜郎侯邑。牂柯都尉居之。南中八郡。悉夜郎之西陲也。其屬縣有梓潼。思王思渝。底水。按梓潼。卽今之桐梓縣矣。○志云。編戶夜郎里中。有李太白故宅。白坐永王璘之禍。南流於此。按蔡寬夫詩話云。太白之從永王璘。世頗疑之。唐書載其事甚略。亦不爲明辨。其是否。獨其詩自序云。半夜水軍來。潯陽滿旌旆。空名適自誤。迫脅上樓船。從賜五百金。棄之若浮煙。辭官不受賞。翻譎夜郎邊。以此觀之。則太白豈從人亂者哉。○太白集有流夜郎題。葵葉云。慚君能衛足。歎我遠移根。白日如分照。還歸守故園。其流夜郎。卽開醜不預詩云。北闕聖人歌。太康南冠。君子竄遐荒。漢酺聞奏鈞。天樂願得風。吹到夜郎。寄內詩云。夜郎天外。怨離居。明月樓中音信疎。北雁春歸看欲盡。南來不得豫章書。流夜郎贈辛判官云。昔在長安醉花柳。五侯七貴同杯酒。氣岸遙凌豪士前。風流肯落他人後。夫子紅顏我少年。章臺走馬著金鞭。文章獻納麒麟殿。歌舞淹留玳瑁筵。與君自謂長如此。甯知草動風塵起。函谷忽驚胡馬來。秦宮桃李向胡開。我愁遠謫。夜郎去。何日金雞放赦回。寄韋南陵冰云。胡驕馬驚塵沙起。胡雛引馬天津水。君爲張掖近酒泉。我竄三

巴九千里。天地再新法。令寬夜郎遷。客帶霜寒。西憶故人不可見。東風吹夢到長安。竄夜郎憶秋浦桃花。舊遊云。桃花春水生。白石今出沒。搖蕩女蘿枝。半挂青天月。不知舊行徑。初攀幾枝蕨。三載夜郎還。於茲煉金骨。又夜郎承恩放。還兼欣克復。京師示息秀才云。黃口爲人羅。白龍乃魚腹。得罪豈怨天。以愚陷網目。鯨鯢未翦滅。豺狼屢翻復。悲作楚地囚。何日秦庭哭。遭逢二明主。前後兩遷逐。去國愁夜郎。投身竄荒谷。半道雪屯蒙。曠如鳥出籠。遙欣克復美。光武安可同。天子巡劍閣。儲皇守扶風。揚袂正北辰。開襟攬羣雄。胡兵出月窟。雷破關之東。左掃因右拂。旋收洛陽宮。回輿入咸京。席卷六合通。叱咤開帝業。手成天地功。大駕還長安。兩日忽在中。一朝讓寶位。劍寫傳無窮。媿無秋毫力。誰念嬰鑠翁。弋者何所慕。高飛仰冥鴻。棄劍學丹砂。臨爐雙玉童。寄言息夫子。歲晚陟方蓬。○唐李嘉祐送上官侍御詩。莫問黔中路。令人到欲迷。水聲巫峽裏。山色夜郎西。張籍送蠻客詩。借問炎州客。天南幾日程。江南惡溪路。山遠夜郎城。按志。夜郎城在桐梓驛二十里。有碑版字已剝蝕。明楊慎元夕梓桐驛詩云。載石孤峯古驛門。青羌吹笛報黃昏。三家村裏無燈火。千樹梅花作上元。夜郎曲云。夜郎城。桐梓原東堞壘平。村民如野鹿。猶說翰林名。夜郎溪。槩木陰中半景西。漁舟投樹宿。水鳥遶花啼。夜郎歌。漢宮曾取教秦娥。竹枝傳竊糾。楊柳轉猗儻。○志云。夜郎里有廢扶歡縣址。按寰宇記。扶歡縣。唐貞觀十七年。與榮懿縣同置。以縣東扶歡山爲名也。屬溱州。唐書貶韓偓爲榮懿尉。卽此地。又有廢溱溪郡。按寰宇記。溱州土地所屬。與夷州同。亦貞觀十七年。置天寶元年。改爲溱溪郡。志又有廢鼎山縣。在治西十里。不知何代設。城壘猶存。

仁懷縣

寰宇記云。芙蓉縣。唐貞觀五年置。屬郫州。尋屬牢州。十六年。牢州廢。改屬夷州。又改屬播州。初置在芙蓉山上。後移於縣東南三里之芙蓉江側。此芙蓉縣之所由名也。○寰宇記又云。仁水在縣西南一里。東南流注郫水。志云。仁水在宣慰司東南五十里。此仁懷縣之所由名也。○圖經云。廢舍月縣在州東南九十里。唐貞觀九年於縣理置高山縣。旋改爲舍月縣。以界內舍月山爲名。涪陵江在其東九十里。○廢胡江縣在州東南四十里。貞觀九年於縣置貢山縣。旋改爲胡江縣。以界內胡江爲名。有巴水在其南三十四里。○廢羅爲縣。在縣西南二百里。貞觀九年置郫施縣。旋改爲羅爲縣。以界內羅爲水爲名。水源自縣西百里羅爲山出。流經縣南。又東流至胡江。入涪陵水也。顯慶五年廢。城址猶存。○廢胡刀縣。在縣西南五十里。貞觀九年置釋鷲縣。旋改爲胡刀縣。因胡刀水爲名。水在縣南一里。東流合胡江。開元二十六年廢。

眞安州

圖經云。本夷州之境。與黔思犬牙。其地山溪竦秀。岡巒連綿。竹樹茂林。千里不絕。物產頗饒。與渝之南川。武隆。彭水相接壤。○寰宇記云。唐貞觀十七年。廓闢邊夷。置播川鎮。後因其處有降珍山。乃以鎮爲珍州。取山名也。長安四年。改舞州。開元十三年。又改鶴州。十四年。復爲珍州。宋乾德四年。刺史田遷上言。自給賜珍州郡名已來。連遭火災。乞改州名。詔改爲高州。尋以嶺南有高州。加西字。元復爲珍州。僞夏明玉珍避諱。因改爲眞州。○圖經云。唐太宗開山洞。始置珍州。時并置夜郎。麗泉。樂源三縣。寰宇記云。其縣并在

州側近或十里或二十里。隨有畚田處爲寄理。移轉不定。方輿云。珍州有麗皋。白厓。思義。安定。壽山五堡。官軍所駐也。夜郎今桐梓縣。樂源廢縣在治西六十里。有樂道書院。漢尹珍建。又云。尹珍以俗敦稼穡。併建移本堂。○紀勝云。珍州有東松。西松。豹子。羅蒙四山。按二松俱在州南三百二十五里。豹子在州北八里。山多產豹。羅山在州西南三百里內。唐志有羅蒙縣。言此山高遠。可瞰羅蒙也。○勝覽云。三江者。去州三十里。卽明溪。又曰虎溪。在州東十七里。思溪在州西北百八十里。出南平軍。與明溪合。又有貫珠溪。按在今治西八十里。源出虹轉山下。屈曲會合三江矣。○志云。楊六郎寓白鳩亭。亭在古城。其憩休處在三塊石。足迹猶存。按六郎宋太原楊業之子。楊延昭也。事跡不可考。又云。僞夏傑號其將江甲立築城以守。舊州城是也。眞州將鄭昌孫據石城抗之。今南山寨是也。天兵初至。昌孫執中立以獻命。得世其地焉。按平播之後。眞州始加安字。州判官有鄭駱二姓。鄭卽昌孫後也。駱氏未詳。方輿勝覽云。宋徽宗時。大略解上下族帥駱世華。駱文貴等獻地立珍州。亦曰樂源郡。或卽駱之始云。

綏陽縣

寰宇記云。夷州義泉郡理綏陽縣。在漢爲牂柯郡境。歷代恃險。不聞臣附。隋大業七年。始受招慰。置綏陽縣。屬明陽郡。今甯夷縣西北八十里。舊明陽郡是也。唐武德四年。罷郡置夷州。於思州甯夷縣。領夜郎。神鳳。豐樂。綏養。雞翁。伏遠。明陽。高富。甯夷。思義。丹川。宣慈。慈岳十三縣。六年廢雞翁縣。貞觀元年廢夷州。仍省夜郎。神鳳。豐樂三縣。以伏遠。明陽。高富。甯夷。思義。丹川六縣隸務州。宣慈。慈岳二縣隸溪州。綏養縣屬

智州四年於黔州都上縣復置夷州。六年復分置雞翁縣。十一年以義州之綏陽、黔州之高富二縣來屬。其年又自都上縣移於今理。領綏陽、都上、高富、雞翁四縣。十七年又以廢牢州義泉、洋川二縣來屬。天寶元年改爲義泉郡。乾元元年復爲夷州。按今貴州石阡府所轄多係夷州地。以綏陽爲舊理所。故詳及之。○圖經綏陽縣有波利山。在北二十里。有安徽水。一名孤微水。西自綏養故縣來。東流經縣南八里。又東入都上縣界。涪江水在縣東十八里。南流注安徽水。○方輿云綏陽故城在今縣西三里。貞觀十二年移於今理。廢城存。按縣志今綏陽又移治劬竹里。在真州長官司西北二百五十里外。○志云縣北十里碧霄洞闊數十丈。懸石嶙峋。天成萬態。如刻如畫。又二十里有三漲水。卽羅甘溪也。其源出於古井。每日辰午申三潮不爽焉。○古蹟考云趙家里之望魚樓。旁有三撫墓。按楊僧家廟碑三撫姓趙氏。鄱陽人。乾符初播有白龍太子之亂。其父常寨團練使。偕楊祖平之遂插草爲標於杉木堂。入籍而生三撫。旣長有神異。讀書於趕水鎮。嘗騎馬歸。躡下拖砂石兩片。今趙廟前上馬礮是也。刻有壬戌年等字。墓存廟後二十丈許。有隙可窺。見其槩以鈎懸去地二尺許。○古蹟考云朗水里之溪源地。有柳宗元書院。按子厚以柳易播。尙未得請。不知何以有祠。曰重其義也。○志云宋大觀初於綏陽縣置承州。廢都上縣在其南二十里。廢義泉縣在西南百里。廢洋川縣在西北百里。○寰宇記云都上縣隋置。唐武德元年屬黔州。貞觀四年置夷州縣爲理所。十一年州始移綏陽。有涪水。一名泝野水。西北自綏陽縣界流入。經縣西十四里。又折西南流。入費州雞翁縣界。○義泉縣本牂柯地。隋大業十一年置。初屬明陽郡。唐武德二年改屬義

州。貞觀十一年於縣理置牢州。十七年牢州廢。縣屬夷州。有支離水。東北自廢綏養縣流入。流經縣西。又東南流入廢樂安縣界。○洋川縣亦牂柯地。武德二年於縣東北七十里置屬義州。貞觀元年改屬思州。開元二十五年屬夷州。有小水西南自廢高富縣流入。東北經縣七十里。又北入務川縣界。○甯夷縣舊屬思州。開元二十五年屬夷州。○廢高富縣在今州東北百里。隋大業七年於廢縣南三十里置屬明陽郡。末年陷夷獠。唐武德四年再置屬夷州。貞觀元年改屬務州。十年又改屬黔州。十一年復屬夷州。有小水在其縣南三十里。東入甯夷縣界。○廢雞翁城在縣西南七十里。武德四年置屬夷州。有洑野水。東自都上縣界流入。經縣南三里。又南入費州城樂縣界。永徽後與高富縣同廢。

蜀中名勝記卷之二十一

下川東道

夔州府一奉節縣附郭

水經曰江水又東逕南鄉峽東寰宇記云南鄉峽在奉節縣西四十七里龍洞溪出焉按卽今之龍洞候館矣梁元帝早發龍窠詩征人喜放溜曉發晨陽隈初言前浦合定覺近林開不疑行舫動惟看遠樹來還瞻起漲岸稍隱陽雲臺○經云江水又東逕永安宮南注云劉先生終於此諸葛亮受遺處也其間平地可二十許里江山迴闊入峽所無城周十餘里背山面江頽墉四毀荆棘成林左右民多墾其中郡國志曰劉備改魚復爲永安仍於州西七里別置永安宮城在平地陸游入蜀記云二十七日早至夔州州在山麓沙上所謂魚復永安宮也宮今爲州倉而州治在宮西北甘夫人墓西南景德中轉運使丁謂薛顏所徙比白帝頗平曠然失關險無復形勢按寰宇記云周武帝天和元年自白帝城移理於永安宮南五十步宣政元年復還白帝城矣○志云郡有義泉諸葛武侯所鑿侯慮城中無水乃接筒引泉入城後夔守亡藝以權水取錢至宋待制王龜齡罷之陳剛堯井記云夔惟節度府漕臺西廳有井紹興二年并大壞景公領使事發地二百尺而始及泉以柘木甃之○志云郡學卽永安宮址固陵文類云郡守錢唐單夔同漕使濩澤張玠以紹熙元年六月初吉祇謁先聖先師因延肄業之士別駕漢嘉張子震郡文學

三山柯甲皆在。施萬大甯文學掾。錢塘李廷光。九華湯嵩起三衢。毛憲實與焉。遂會食明道。規廡一新。見國子錄。范仲黼經營之美。因啜茗觀三峽圖。聽水琴聲。清話久之。翛然忘暑。遐想詠歸之風。名教之樂。其有既耶。按柯甲跋云。其字皆隸古體。○碑目云。少陵遊蜀。凡八稔。在夔獨三年。平生所賦詩。凡千四百六篇。而在夔者三百六十有一。治平中。知州賈昌言刻十二石于北園。歲久字漫滅。建中靖國元年。運判王蓬新爲十碑。今碑在漕司。○北園卽瀼西果園也。入蜀記云。地在瀼之西。故一曰瀼西。土人謂山間之流。通江者曰瀼。杜甫暮春題瀼西新賃草屋詩。久嗟三峽客。再與暮春期。百舌欲無語。繁花能幾時。谷虛雲氣薄。波亂日華遲。戰伐何由定。哀傷不在茲。其二。北郊千樹橘。不見比封君。養拙干戈際。全生麋鹿羣。畏人江北草。旅食瀼西雲。萬里巴渝曲。三年實飽聞。其三。綵雲陰復白。錦樹曉來青。身世雙蓬鬢。乾坤一草亭。袁歌時自短。醉舞爲誰醒。細雨荷鋤立。江猿吟翠屏。其四。壯年學書劍。他日委泥沙。事主非無祿。浮生卽有涯。高齋依麩餌。絕域改春華。喪亂丹心破。王臣未一家。又將別巫峽。贈南鄉兄。瀼西果園四十畝。詩云。苔竹素所好。萍蓬無定居。遠遊長兒子。幾地別林廬。雜蘂紅相對。他時錦不如。具舟將出峽。巡圃念攜鋤。正月喧鶯未。茲辰放鶴初。雪籬梅可折。風榭柳微舒。託贈卿家有。因歌野興初。殘生逗江漢。何處狎樵漁。○郡有制勝樓。卽北樓也。宋張商英序云。夔據荆蜀往來之衝。瀘施黔驛場之郡。倚州爲重。而頽垣廢壑。居民暮夜出入不禁。殆非所以防微消患。嚴官府。壯屏翰之意也。熙甯十年。轉運副使董大夫請於朝而新之。知郡事王仲祥董其役。遂負赤甲之固。合月臺之遺址。而增築之。建爲譙樓。宏大煥發。凡山川

之形勝盡在目中。大夫以制勝名之。蓋慮深哉。既落成。諸公府詩以詫之。將鏡于石以廣其傳。於是金馬張商英適西來爲之序云爾。尙書司門郎中知軍州事王延禧北樓詩云。夔子城新築。長江便作濠。欲兼諸回敵。故起北樓高。卽舊基仍峻。因時力不勞。青天纒咫尺。翠壁似周遭。近照東西瀼。遙分上下牢。百蠻歸指掌。三峽見秋毫。帝道方無外。皇威到不毛。三鉤閑夜鎖。八陣縱春遨。守土慙非稱。提兵亦謬叨。經營皆使指。備豫本戎輅。力乏爲山助。名加制勝褒。登臨欲吟吃。深愧杜陵豪。○方輿勝覽云。白雲樓在計臺。有三層程之才序云。漕舍據此山之麓。西園錦石堂。又據漕舍之北。地勢最高。歲久且敝。因稍增築。代以重樓。名其上曰白雲樓。中曰秋濤閣。下曰山堂。登覽之勝。甲於一郡。於其成也。不可無紀。輒吟詩一篇。爲作者前驅耳。詩云。鸞熊城郭遠蒼崖。萬疊煙嵐亦壯哉。平地窺覲心未愜。重樓徙倚眼前開。披襟風月爭新入。剖目江山破迴來。日落三峨知處所。雲浮雙闕欲崔嵬。胡牀不愧庾公興。奕簞還思杜老才。更待攜衾盡清景。夜深欄檻逼昭回。○勝覽云。江月亭在戎鈴司。王龜齡詩。長江何處水。明月幾州天。月與江無約。相逢是偶然。碑曰云。癸亥燈夕前一日。臨川何異同叔招王鈴轄飯。次日當用故事。邀漕使鉅野李誠之同至江月亭。鈴轄錄示梅谿舊題。豫有所請。方辭以老罷。無復強綴語。言聊記歲月云爾。是夕五鼓。形於夢寐。得二十字。其辭曰。月湖湖上月。到處有光輝。旣解相隨出。當須照我歸。覺而甚喜。歸日可期。旣登茲亭。水月相得。愈切刀頭之夢。故併書以遺之。鈴轄名光遠。字宏父。是爲江月主人。○固陵文類云。瑞白堂在治內。郡守王十朋五月十五日夜與劉韶美草酌於瑞白堂。秉燭觀跳珠。分韻得跳字。詩云。五月峽

中天氣歇。竹筍引水。那能澆。江濱龍老臥未起。崖石不枯。珠自跳。草草杯盤對君酌。燈前疑是簷花落。毫
 端寫出萬斛珠。共向炎天作冰雹。妃子名園荔子丹。絳囊初摘堆金盤。細擘輕紅唱君曲。咀嚼水晶牙頰
 寒。老翁真箇如年少。激水成珠堪一笑。劉侯自有胸中珠。不止照人兼自照。劉儀鳳得珠字云。別來世故
 朝昏殊。相與言之汗模糊。兩翁得酒促坐席。感深念極氣欲蘇。籀龍亦解作水供。細繹尋文如渴烏。衣巾
 生秋背毛豎。金石相應環珮趨。江山豪壯傍尊俎。醉中頻貫纍纍珠。此時一事復挂口。爲樂未竟成暗鳴。
 夔州憂民困湯火。潤澤有志無坦途。眼前焦熬十萬戶。欠伸戲笑皆霑濡。自操量鼓入官廩。不輸一錢分
 水符。讀書功力無表畔。久矣俗吏輕吾儒。○韶美有自歸州陸行至夔州詩云。久客歸心速。江流設險艱。
 夢驚人鮮甕。生出鬼門關。草滿離騷國。神依暮雨山。未平千古恨。慘澹入躋攀。又飛溜時時雨。疎風處處
 蟬。草茵秋臥月。雲幕午垂天。夷險籃輿底。陰晴鳥道邊。荒村無勞酒。坐睡媿頰肩。又戶口村無幾。犁鋤力
 不堪。林荒樛櫟壽。月黑虎狼貪。幽絕雲眠穩。清閑谷飲甘。故山深未極。壤斷蓋茅菴。又倚伏關。翠動幽微
 各有生。燒痕移窟穴。林曲聚飛鳴。瘠土常饑色。層坡被惡名。經行不睡地。山好故留情。又曠野無人宿。危
 亭犯雨過。嶺雲堆嵐最。利海現兜羅。酒觸秋懷壯。天留暮色多。不勝行役苦。栽入竹枝歌。又行行夔子國。
 尺寸到江濱。間闕一杯酒。平生三故人。逐臣猶費祿。夢境欲抽身。脫粟羹藜苒。重關任汝噴。自注云。故人
 謂龜齡。元章。行可也。按韶美。普州人。性酷嗜書。祕閣板木。抄錄殆遍。親自校讎。至杜門絕交。爲人劾歸。詳
 見著作記及詩話中。○經云。江水又東。逕諸葛亮岡。壘南。注云。石磧平曠。望兼川陸。有亮所造八陣圖。東

跨故壘。皆累細石爲之。自壘西去。聚石八行。行間相去二丈。因曰八陣。旣成。自今行師。庶不覆敗。皆圖兵勢。行藏之權。自後深識者所不能了。今夏水漂蕩。歲月消損。高處可二三尺。下處磨滅殆盡。荊州圖副云。永安宮南一里。渚下平。積上週迴四百一十八丈。中有諸葛孔明八陣圖。聚細石爲之。各高五尺。廣十圍。歷然棋布。縱橫相當。中間相去九尺。正中開南北巷。悉廣五尺。凡六十四聚。或爲人散亂。及爲夏水所沒。冬水退。復依然如故。八陣圖下東西三里。有一積東西一百步。南北廣四十步。積上有鹽泉井五口。以木爲桶。昔常取鹽。卽時沙壅。冬出夏沒。劉賓客嘉話錄云。夔州西市俯臨江岸。沙石下有諸葛亮八陣圖。箕張翼舒。鷺形鶴勢。聚石分布。宛然尙存。峽水大時。三蜀雪消之際。湏湧滉漾。可勝道哉。大樹十圍。枯槎百丈。破礧巨石。隨波塞川而下。水與岸齊。人奔山上。則聚石爲堆者。斷可知也。及乎水落川平。萬物皆失。故態唯諸葛陣圖。小石之堆標聚。行列依然。如是者僅已六七百年。淘灑推激。迨今不動。高似孫緯略曰。八陣圖在魚腹者。隨江布勢。填石爲規。前障壁門。後倚卻月。縱八橫八。魁容二丈。內面偃月。九六鱗差。江自岷來。奔怒湍激。驚雷迅馬。不足以敵其雄也。徒華變滄。不足以窮其力也。磊磊斯石。載轟載椿。知幾何年。曾不一戾。是非天所愛。神所做者歟。詩林載晉桓温伐蜀。觀八陣圖詩云。訪古識其真。尋源愛往跡。恐君遺事節。聊下南山石。仍顧謂從事曰。此常山蛇勢也。杜甫八陣圖詩。功蓋三分國。名成八陣圖。江流石不轉。遺恨失吞吳。劉禹錫詩。軒皇傳上略。蜀相運神機。水落龍蛇出。沙平鷺鶴飛。波濤無動勢。鱗甲避餘威。會有知兵者。臨流指是非。蘇軾詩。平沙何茫茫。髣髴見石龜。縱橫滿江上。歲歲沙水齧。孔明死已久。誰復

辨行列。神兵非學到。自古不留訣。至人已心悟。後世徒妄說。自從漢道衰。蜂起盡奸傑。英雄不相下。禍難久連結。驅民市無煙。戰野江流血。萬人賭一擲。殺盡如沃雪。不爲久遠計。草草常無法。孔明最後起。意欲掃羣孽。崎嶇事節制。隱忍久不決。志大遂成迂。歲月去如瞥。六師紛未整。一旦英氣折。唯餘八陣圖。千古壯夔峽。蘇轍詩。漲江吹八陣。江落陣如故。我來苦寒後。平沙如匹素。乘高望遺迹。磊磊六四數。遙指如布棋。就視不知處。世稱諸葛公。用衆有法度。區區落褻斜。軍旅無闊步。中原竟不到。置陣狹無所。茫茫平沙中。積石排隊伍。獨使後使人。知我非莽鹵。奈何長蛇形。千古竟不悟。惟餘桓元子。久視不能去。李興宗詩。江從岷來觸瞿唐。夏潦潰裂怒勢張。霜溝水落洲渚露。纍纍江石堆作行。半斜半直半疎密。方營周市門。東出相傳呵護有鬼神。驚波不能移寸尺。想見當年諸葛公。綸巾羽扇揮愁風。令嚴部伍寂如水。出沒變化機無窮。乾坤不足當經理。寫留古法良岑趾。上灘下峽一千年。多少英雄測元旨。小兒元子強多知。常山蛇勢吾能窺。灞上枋頭真絕倒。空使虬髯論崛奇。斲輪不可傳其子。此公天機絨骨髓。奈何螟蝗生蝮蝎。炎劉已灰吹不起。天教三馬食一槽。老馬啣嚙暫咆哮。渭陽巾幗勢將蹶。大星夜隕西軍號。嗚呼興廢盡天意。中原腥羶今六紀。胡雛骨肉正相殘。欲拯塗炭嗟誰使。大官酣燕芻豢餘。小官跼踖塵埃裏。舉目厭厭九泉人。誰訪草廬談世事。向來韜略機莫投。而今投機欠良籌。君不見峽山深深茅舍底。有人抱膝高聲謳。張續陪安撫大卿登八陣臺。覽觀諸葛公遺像。偶成長句云。白帝城西魚復浦。十月江平見津澗。當年累石紛成行。此地臥龍經講武。轅門外建嚴中權。列陣相承存後伍。何人蛇勢識常山。未數魚麗矜

鄭拒懸知精神貫金石尙想號令嚴鉦鼓老兵料敵應疑生川后澄波其敢侮向令赤伏有餘符下睨皇州直指取云何遺跡司神明獨靳豐功被寰宇高城置酒共臨眺往事興懷增歎撫巍然王佐三代前信矣明言照千古○舊經云八陣圖銘石刻在磧中今不復見張季長詩刻銘久伏水底碑教戰時存山下鼓自注云有圖銘巨石今伏水底又云山下有石鼓相傳爲武侯教戰之音也○志云先主廟舊在永安宮南今移白帝城內杜甫謁先主廟詩慘澹風雲會乘時各有入力伴分社稷志屈偃經綸復漢留長策中原仗老臣雜耕心未已歐血事酸辛霸氣西南歇雄圖歷數屯錦江元過楚劍閣復通秦舊俗存祠廟空山泣鬼神虛簷交鳥道枯木半龍鱗竹送清溪月苔移玉座春閭閻兒女換歌舞歲時新絕域歸舟遠荒城繫馬頻如何對搖落況乃久風塵孰與關張並功臨耿鄧親應天才不小得士契無鄰遲暮堪帷幄飄零且釣緇向來憂國淚寂寞灑衣巾○三山林栗詩序云諸葛武侯祠舊在西山歲久摧圯永嘉王詹事帥夔日移置陣磧淳熙漕使張著庭重修杜甫諸葛廟詩久遊巴子國屢入武侯祠竹日斜虛寢溪風滿薄帷君臣當共濟賢聖亦同時翊戴歸先主并吞更出師蟲蛇穿畫壁巫覡醉蛛絲欸憶吟梁父躬耕起未遲竇叔向武侯廟詩永安宮外有祠堂魚水恩深祚不長角立一方初退舍擬稱三漢更圖王人同過隙無留影石在窮沙尙啓行歸蜀降吳竟何事爲陵爲谷任蒼蒼○方輿勝覽云武侯廟在八陣圖之臥龍山上時州理白帝故少陵詩云猶有西郊諸葛廟臥龍無首對江濱也有堂曰開濟堂何耆仲開濟堂小記云堂閱歲久垂壓矣淳熙彊圉作噩瀆山何耆仲假守舉而新之因訪善本重肖侯像摘老杜兩

朝開濟老臣心之句。以字堂。巫山尉任份來董事。春二月乙亥落成。丁謂遊臥龍山詩。日長春老職司閑。縱轡因尋郭外山。花氣半飄青靄外。泉聲多在白雲間。香燈肅肅嚴僧事。鐘梵蕭蕭爽客顏。坐有詩人樽有酒。擬拋城市宿禪關。溫陵曾慥和承平桑者自閑閑。巴俗燒畬滿四山。招集賓僚來野次。追呼父老到田間。及時勸課知宣化。繼踵催科卻厚顏。底事羣僧享安逸。坐令檀施叩禪關。陸游題臥龍山詩。涪翁幾日客。遺墨徧蒼崖。作吏今三月。偷閒始一來。雲歸就簷宿。江怒觸山迴。更欲窮幽賞。城頭疊鼓催。查籥題臥龍武侯廟詩。山巔祠貌儼丹青。千載懷人爲一登。隱隱故營連白帝。茫茫恨水向西陵。石根蘭芷香無價。雲頂松杉翠作厝。人事天機古難料。詩成試語定中僧。周時題臥龍詩。雨過羣峯入骨青。杖藜曾憶去年登。無風細路尋蕭寺。落照孤城認固陵。割據江濤隨渺渺。清明花樹又層層。不聞不見無窮盡。唯有禪房白足僧。王十朋題臥龍山觀音泉二十韻。呈行可元章云。去歲游廬山。社中觀白蓮。不飲遠公酒。聊酌聰明泉。肩輿過武昌。乘興西山巔。岳乳飲菩薩。詩篇誦蘇仙。夔州苦無井。瘞俗殊可憐。竹筍喉不乾。可浣不可煎。日汲臥龍水。屢賴擔夫肩。所取卻幾斛。深慙未投錢。前日招提游。入耳聲涓涓。泓澄可照膽。草木皆光妍。道人出新茗。林間手親研。至今清夜夢。猶到幽亭邊。交遊況離索。回首成悽然。何時鹿呦呦。重訪山中禪。柯甲題臥龍武侯廟詩。巴江一綫束巴山。不礙登臨氣象寬。寺隱蟠龍松影亂。碑殘科斗蘚痕漫。十分激灑隨宜暖。一酌泓澄徹骨寒。欲說孔明千古恨。令人勇跨玉驄鞍。三山朱煥詩云。野往從來物外便。瘦筇拄到臥龍巔。下臨斗絕疑無地。峻極盤旋別有天。遠遠峯巒猶帶雪。蒼蒼竹柏幾經年。武侯向日

三分國。大士今朝一派泉。休泥遺編論往事。且將此水滌眞田。淵源瑩潔爲方寸。世界收藏幾大千。黃山谷臥龍行記云。天水張茂先世京南昌黃庭堅魯直弟叔向嗣直建中靖國元年三月丁卯同來時左綿道人思順開法席於此山。道俗歸心。荆棘草萊化爲金碧。新雨晚晴同登中閣。觀白鹽之崇岫。想少陵之風流。歎大雅之不作。裴徊久之。跋云。涪翁以文學名世。書學徐浩而婉美。翁死三十年矣。今人見其翰墨及從之遊者。莫不欣然景慕之。都運徽猷久從翁遊。而文學翰墨皆造其妙。步趨之相若。模範之相承。譽望之相維。輝映炳耀卓乎其能肖也。後之人苟未知涪翁之賢。請觀於公可知矣。苟有未知公之賢。請觀於涪翁可知矣。建炎五年正月日。門生從政郎夔州奉節縣令主管勸農公事王行謹跋。○潁川劉均國邀古雍李紹隆。洛陽邢仲時。陽翟衛師房。黃山韓次阮。游臥龍山咸平院。謁長老忍禪師。建炎四年十月晦日。均國之子瓊侍。○侍郎閣公運使張公同遊臥龍紀行云。余初自宣威幕府送季長奏事北闕。入道山爲學士。後三年。余始被命造朝。遂玷論思之列。今丐祠得請而歸。會季長護漕夔門。相與道舊。故握手驚嘆。蓋闊別已十年矣。辱通家燕款。浹辰亡倦。最後游臥龍山。松風蕭爽。雲日蔽虧。千載英靈。恍若來下。晚趨躍馬城。赤甲白鹽峻極天半。晴光返照。噴浪帖伏。慈明行酒。道韞誦詩。至大醉而去。不圖天涯爲樂之。至於斯也。淳熙九年三月癸巳。唐安閣蒼舒才元書。○王十朋臥龍行記云。永嘉王龜齡少城周行可。海陵查元章。載酒來遊。時凍雨初霽。風日清美。山谷明秀。照人道傍。雜花盛開。籃輿徐行。應接不暇。寺有茶蘼。羅絡松上如積雪。崇蘭數百本。秀發巖石間。微風透香。所至芬郁。東榮牡丹大叢。雨前已開。道人植

蓋護持留以供客飲罷縱步泉上淪茗賦詩而歸乾道丙戌清明前四日○陸游跋關著作臥龍行記云著作關公出使峽中風采峻甚仕者人人震慄莫敢仰視遊以孤生起罪籍萬里佐州淺闇滯拙自期且汰去而關公獨厚遇之舉酒賦詩談臺閣舊事忘其位之重也公免歸之明年游以事至臥龍山咸平寺長老惠棧言公往有行記今將刻之石因屬游書其末游曰方關公之門可炙手時此書伏不出今公歸臥青城山中賓客解散形勢一變而棧方刻其書爲不朽計嗟乎足以愧士大夫矣乾道七年七日左奉議郎通判夔州軍州主管學事陸游謹識按關著作者孫青城人○黃傑臥龍紀行云帥帳跨鼉陳損之繡衣具茨王璆聯轡登臥龍置酒高會賓客從者十有六人是日金虎嘯風丹雲蔽日涼生尊俎興在江山獻酬賡唱之餘挹大士泉訪海仙像塵慮息神情清瞿塘晝漏垂盡乃去真勝遊也慶元己未七月十有四日魯齋黃人傑書○李璉臥龍行記云眉山李季允同漢嘉王申父襄陽晁亞夫來遊時春陽驟驕風埃四起酌泉松石間意頗愜無何雷雨忽至晚登寺閣望赤甲白鹽山色如洗相與舉酒樂甚遂留宿山房慶元六年五日○水經注云白帝城西有孤石冬出水二十餘丈夏卽沒秋時方出灩澦如象行人莫上灩澦如馬行人莫下峽人以爲水候李膺益州記云灩澦堆與水漲沒數十丈其狀如馬舟人不敢進故曰灩澦又曰淫豫言舟子取途不決水脈故猶豫也南史云淫豫大如襪瞿塘不可觸樂府云淫豫大如馬瞿塘不可下類要云淫豫大如鼈瞿塘行舟絕淫豫大如龜瞿塘不可窺坤元錄又作猶豫水經注灩澦歌曰江頭白渚堅相持倏忽淪沒別無期孝子傳云庾子輿扶父柩過瞿塘六月水泛子輿禱而

遂平。既過。泛溢如故。人歌之曰。灩澦如牛。本不通。瞿塘水退爲庾公。○成子韶高齋題灩澦水則云。開封成鋪子韶寄瞿塘關懷安瘞渥澤民。成都郭公臨舜卿東去。過高齋。覽形勝。遣人撐舟。垂繩墜石。則灩澦之水。約八十四丈。子韶曰。夏中江漲。灩澦上水。猶三十餘丈。可想見矣。澤民之子慶胃侍。淳熙乙巳正月二十五日。○范成大吳船錄云。六月丙辰泊夔州。早遣視瞿塘水。僅能漫灩澦之頂。盤渦散出其上。謂之灩澦撒髮。人云如馬。尙不可下。況撒髮邪。是夜半水忽驟漲。滄及排亭。及明走視灩澦。則已在五丈以下。或可以僥倖入峽。而夔人猶難之。丁巳水漲未已。遂決解維。十五里至瞿塘口。水平如席。獨灩澦之頂。猶渦紋淺澗。舟拂其上。以過。搖櫓者皆汗手死心。面無人色。蓋天下至險之地。行路極危之時。旁觀者盡皆驚阻。余已在舟中。一切付之自然。不暇問。據胡牀。坐招頭處。任其盪兀。每一舟入峽數里後。舟方續發。水勢怒急。恐猝相遇。不可解拆也。帥司遣卒執一旗。次第立山之上。下一舟平安。則簸旗以招後船。舊語云。灩澦大如樓。瞿塘不可觸。灩澦大如馬。瞿塘不可下。此俗傳灩澦大如象。瞿塘不可上。蓋非是也。後人立石辨之甚詳。峽中兩岸高巖峻壁。斧鑿之痕。皴皴然而黑。石灘最號險惡。兩山東江驟起。水勢不能平。余來此。水勢適可。俗所謂茶槽者。又水大漲。滄沒草木。謂之青草齊。則諸灘之上。水寬少浪。可以犯之。余之來此。水未能盡漫草木。但名草根漲。亦不可涉。然犯難而行。不可回首也。陸游入蜀記云。二十六日晚至瞿塘關。唐故夔州與白帝城相連。杜詩白帝夔州各異城。蓋言難辨也。關西門正對灩澦堆。堆碎石積成。出水數十丈。土人云。歲旱時石露大半。有三足如鼎狀。○關者孫瞿塘關行記云。乾道庚寅中元日。關者

孫約李時雨、陳彥、岳建壽、宋嵩、李普、張徽之、雍大椿、飲於三峽堂。晚攜餘觥下瞿唐。關訪夔刺史。舊治客曰。今之司關者之居是也。遂飲於此。茂林修竹間。小亭縈紆。客曰。此唐劉夢得故宅址。夢得遺墨舊有石好事者取去。復飲關上。高齋誦少陵薄雲巖際宿。孤月浪中翻之詩。歎此老具眼如此。夔江山元惡。爲少陵所紀處。獨異。高齋其一也。高齋故基。屋隘而陋。予惜之。方欲爲太守。王君言客陳彥辛景賢出。願出力更築之。僕謂不可隘而陋。亦不可侈而大。此少陵誅茅避世意也。併書以告二子云。景賢今司瞿唐關者。○詩話珊瑚鉤云。唐周邕自蜀買奴曰水精。善沈水。乃崑崙泅水之屬也。邕疑瞿塘之險。必有怪。使水精入瞰之。久乃出曰。下有關。不可渡。得珠貝而還。按今謂之下關城矣。○樂府解題曰。瞿盛也。唐。陂池也。言盛水其中。可以行舟也。又云。夏則爲瞿。冬則爲唐。杜甫瞿唐兩崖詩云。三峽傳何處。雙崖壯此門。入天猶石色。穿水忽雲根。獠獠鬚髯古。蛟龍窟宅尊。羲和冬馭近。愁畏日車翻。白居易夜入瞿塘峽詩云。瞿塘天下險。夜上信難哉。岸似雙屏合。天如匹練開。逆風驚浪起。拔筴暗舡來。欲識愁多少。高於灑瀨堆。宋肇峽口詩云。萬里西南路。瞿塘居上游。峽分山對立。江令水爭流。蛟鱗從來患。風波自古愁。幾時飛兩槳。歸去滿帆秋。蘇軾瞿唐峽詩云。自昔懷清賞。今茲得縱探。長江連楚蜀。萬派瀉東南。合水來如電。黔波綠似藍。餘流細不數。遠勢競相參。入峽初無路。連山忽似龜。縈紆收浩渺。蹙縮作淵潭。風過如呼吸。雲生似吐含。墜崖鳴窅窅。垂蔓綠穆穆。冷翠多崖竹。孤生有石楠。飛泉飄亂雪。怪石走驚驂。絕澗知深淺。樵僮忽兩三人。煙偶逢郭。沙岸可乘籃。野戍荒州縣。邦君古子男。放衙鳴晚鼓。留客薦霜柑。聞道黃精草。叢生綠

玉鑿。儘應充食飲。不見有彭聃。氣候冬猶暖。星河夜半涵。遺民悲昶衍。舊俗接魚蠶。版屋漫無瓦。巖居窄似菴。伐薪常冒險。得水不盈甌。歎息生何陋。劬勞不自慚。葉舟輕遠泝。大浪固無諳。矍鑠空相視。嘔啞莫與談。蠻荒安可駐。幽邃信難耽。獨愛孤棲鶴。高超百尺嵐。橫飛應自得。遠颺似無貪。振翮遊霄漢。無心顧雀鷗。塵勞世方病。局束我何堪。盡解林泉好。多爲富貴酣。試看飛鳥樂。高遁此心甘。蘇轍入峽詩云。舟行瞿塘口。兩耳風鳴號。渺然長江水。千里投一瓢。峽門石爲戶。鬱怒水力驕。扁舟落中流。浩如一葉飄。呼吸信奔浪。不復由長篙。兩山蹙相值。望之不容舳。漸近乃可入。白鹽最雄高。草木皆倒生。哀叫悲元猿。白雲繚長袖。零露如飛毛。○峽程記曰。瀘合。遂。蜀。四州。皆峽中郡。自蠻江。桔柏。淹導等江至此。二百八十江。會於峽前。次荆門。都四百五十灘。卽有清水。重峯。胡灘。漢灘。忽雷。閃電。沱灘。瀨灘。狼尾。使君。主簿。二灘。以沈舟得名。其他不悉記。三峽者。卽明月。仙山。廣澤。其有瞿塘。豔瀨。燕子。屏風之類。皆不預三峽之數。唐楊炯廣溪峽詩。廣溪三峽首。曠望兼川陸。山路遶羊腸。江城鎮魚復。喬枝百丈偃。飛水千尋瀑。驚浪迴天高。盤渦轉深谷。漢氏昔云季。中原爭逐鹿。天下有英雄。襄陽有龍伏。常山訓軍旅。永安興板築。池臺忽已傾。邦家遑淪覆。庸才若劉禪。忠佐爲心腹。設險猶可存。當無賈生哭。○經云。江水又東。逕廣溪峽。注云。斯乃三峽首也。其間三十里。頽巖倚木。厥勢殆交北岸。山上有神淵。淵北白鹽厓。高千餘丈。天旱然火。白鹽椎燼入淵。卽雨。常璩以澤有神。鳴鼓則雨。蜀都賦。謂應鳴鼓而興雨也。刺史二千石經過。皆不得鳴角伐鼓。商旅上下。恐觸石有聲。乃以布裹篙足。此峽多猿。猿不生北岸北。唯一處或有取之。放著此山中。初不聞聲。

將同貉獸渡汝而不生矣。其峽蓋自神禹鑿以通江郭。景純所謂巴東之峽。夏后疏鑿者。杜甫白鹽山詩曰。徐步移斑杖。看山仰白頭。翠深開斷壁。紅遠結飛樓。日出清江望。暄和散旅愁。春城見松雪。始擬放舟歸。按盛宏之荊州記。謂漢高祖伐秦。途經於此。見淵中白壁赤柱。狀若官府。因名龍淵矣。○經云。江水又東南。逕赤岬。西注云。是公孫述所造。因山據勢。周迴七里。一百四十步。東高二百丈。西北高一千丈。南連基白帝山。甚高大。不生樹木。其石悉赤。土人云。如人袒胛。故謂之赤岬山。淮南子曰。傍皇於山岬之旁。注曰。岬。山脊也。郭仲產曰。斯名將因此而興矣。注云。赤岬山巖穴中露一匣。甚高不可升。相傳乃古兵書匣。○經云。江水又東。逕魚復縣。故城南。注云。故魚國也。春秋左傳。文公十六年。庸與羣蠻叛。楚莊王伐之。七遇皆北。唯裨儵魚人逐之。是也。地理志。謂江關都尉治。公孫述名之爲白帝城。取其王巴蜀。蓋巴東郡治也。漢獻帝初平元年。分巴爲三郡。以魚復爲固陵郡。趙允訴劉璋。改爲巴東郡。治白帝山。城周迴二百八十步。北緣馬嶺。按赤甲山。其間平處。南北相去八十五丈。東西十七丈。又東傍灑溪。卽以爲隍。西南臨大江。闕之眩目。唯馬嶺小差。委迤猶斬。爲路羊腸數四。然後得上益州。刺史鮑陋鎮此。爲譙道福所圍。城裏無泉。乃南開水門。鑿石爲函道。上施木天公。直下至江中。有似猿臂。相牽引汲。然後得水。水門之西。江中有孤石。爲淫預石。冬出水二十餘丈。夏則沒。亦有出處矣。縣有夷溪。卽峴山清江也。經所謂夷水出焉。益州記曰。水色清照。十丈分沙。蜀人見其澄清。因名清江也。○水經注云。昔廩君浮土舟於夷水。據捍關而王。巴是以法孝直有言。魚復捍關。臨江據水。實益州禍福之門。漢書地理志云。江關都尉理魚復。寰宇記。

蜀章武二年。先主爲吳所敗。改白帝爲永安。晉太康中復永安爲魚復。有故江關。在江南岸。北對州城。宋泰始三年。以山峽險隘。多寇賊。立三巴校尉以鎮之。宋末廢。唐置都督府及刺史郡。治於此。○文苑英華常袞授持節都督夔州諸軍事兼夔州刺史。柏貞節制云。山峽雄重。江關要衝。輿地碑曰。夔州都督府記。唐會昌五年。刺史李貽孫文。繆師禹書。見歐陽公集。古錄。今在漕臺集。古錄云。余嘗謂唐世人人。工書。故其名湮沒者。不可勝數。每與君談。嘆息於斯也。如貝靈該。繆師愈。今人尙不知其姓名。況其書乎。余以集錄之博。僅各得其一爾。○又云。唐夔州刺史廳壁記。長慶二年五月一日。刺史中山劉禹錫撰。今見存。○張說下江向夔州詩。天明江霧歇。洲浦棹歌來。淥水逶迤去。青山相向開。城臨蜀帝祀。雲接楚王臺。舊知巫山上。遊子共徘徊。司空曙送夔州班使君詩。魚國巴庸落。塵幃漢守過。曉檣爭市隘。夜鼓祭神多。雲白當山雨。風清滿峽波。夷陵舊人吏。猶誦兩岐歌。戴叔倫送盧使君赴夔州詩。鏡管隨旌旆。高秋遠上巴。白波連霧雨。青壁斷兼葭。凭几雙童靜。登樓萬井斜。政成知變俗。當應畫輪車。唐求舟行夜泊夔州詩。維舟鏡面中。迴對白鹽峯。夜靜沙堤月。天寒水寺鐘。故園何日到。舊友幾時逢。欲作還家夢。青山一萬重。鄭谷入夔州詩。萬家煙靄裏。隱隱見夔州。夜靜明月峽。春寒堆雪樓。獨吟誰會解。多病自淹留。往事如今日。聊同子美愁。張祐送曾黯游夔州詩。不遠夔州路。層波灑瀟瀟。下來千里峽。人去一條天。樹色秋帆上。灘聲夜枕前。何堪正危側。百丈半山巔。又送楊秀才入蜀夔州詩。鄂渚逢游客。瞿塘上去船。峽深明月夜。江靜碧雲天。舊俗巴渝舞。新聲蜀國絃。不堪揮慘恨。一涕淚潸然。釋齊己送周秀才遊峽中詩。又向夔城去。知難

動旅魂。自非亡國客。何慮斷腸猿。灑灑分高仞。瞿塘露淺痕。明年期此約。平穩到荆門。○白帝城。公孫述所築也。東觀漢記。白帝城舊名魚復。公孫述見白龍入井中。以爲應己之祥。改爲白帝。陳子昂白帝懷古詩云。日落滄江晚。停橈問土風。城臨巴子國。臺沒漢王宮。荒服猶周甸。深山尙禹功。巖懸青壁斷。地險碧流通。古木生雲際。歸帆出霧中。川途去無限。客思坐何窮。杜甫上白帝城詩。城峻隨天壁。樓高更女牆。江流思夏后。風至憶襄王。老去聞悲角。人扶報夕陽。公孫初特險。躍馬意何長。又上白帝城樓詩。江度寒山開。城高絕塞樓。翠屏宜晚對。白谷會深遊。急急能鳴雁。輕輕不下鷗。夷陵春色起。漸擬放扁舟。○城中有白帝廟。入蜀記云。白帝廟氣象甚古。松柏皆百年物。有數碑。皆孟蜀時立。庭中石筍。有黃魯直建中靖國元年題字。又有越公堂。隋楊素所創。少陵爲賦詩者已毀。今堂近歲所築。亦甚宏壯。自關而東。卽東屯。少陵故居也。碑目云。關城白帝廟碑。凡三。其一元和元年。其二長興二年。其三廣政元年。廟有斫殘柏柱。大可十圍。高二十丈餘。乃公孫述時樓柱。所斫之處。忽生枝而不朽。又有三石筍。王十朋詩云。白帝祠前石筍三。根連灑灑立相參。不知此石能言否。往事應同老柏談。自注云。有二柏甚古也。石筍上行記云。江通濟道。呂珣東玉。黃庭堅魯直。同來。建中靖國元年三月。○方輿勝覽云。越公堂在瞿唐關城內。隋楊素所建也。杜甫宴越公堂詩。此堂存古制。城上俯江郊。落構垂雲雨。荒堦蔓草茅。柱穿蜂溜蜜。棧缺燕添巢。坐接春杯氣。心傷豔藥梢。英靈如過隙。宴衍願投醪。莫向東流水。生涯未卽拋。張俞越公堂詩。越公作隋藩。烈烈耀威武。駐馬白帝城。營堂壓巴楚。俯瞰萬里流。徘徊覽千古。鬼工役精魄。梓制銜刀斧。四柯無欒櫨。

大廈唯柱礎。崢嶸露節角。犀豁轉檐廡。丹漆久磨滅。風雲尙吞吐。自注云。堂奇構宏敞。內無撐柱。覓視中脊。邈不可度也。○城隅有堂曰三峽堂。宋肇詩云。林巒十里上巉巖。飛檻初憑縹緲間。夔子風煙依白帝。夜郎耕稼接烏蠻。砌橫亂石遙臨澗。門對高峯近帶山。咫尺驚湍吁莫測。每來登此念江關。又云。初尋磴路踏雲煙。漸引茅簷屋數椽。江影動搖波面日。山光隱見峽中天。放懷樽酒憑欄客。回首舩歌趁市船。要與舟人同此樂。移花種竹滿巖前。呂商隱三峽堂行記云。商隱被命赴闕。大卿李先生實帥夔門。作三峽堂。成而未考也。因相率置酒作樂其上。同來者郡僚張悅之。陳子長。員仲文。謝邦彥。堂據峽口。俯瞰洪流。震搖灑灑。眞爲偉觀。歲淳熙己亥八月二十三日。成都呂商隱周父書。○有杜甫宅。少陵移居夔州郭內。詩。伏枕雲安縣。遷居白帝城。春知催柳別。江與放舡清。農事聞人說。山光見鳥情。禹功饒斷石。且就土微平。又入宅詩云。奔峭背赤甲。斷崖當白鹽。客居愧遷次。春酒漸多添。花亞欲移竹。鳥窺新卷簾。衰年不敢恨。勝概欲相兼。其二。亂後居難定。春歸客未還。水生魚復浦。雲暖麝香山。半頂梳頭白。過眉拄杖斑。相看多使者。一一問函關。其三。宋玉歸州宅。雲通白帝城。吾人淹老病。旅食豈才名。峽束風常急。江流氣不平。祇應與兒子。飄轉任浮生。又西閣詩云。西閣百尋餘。中宵步綺疏。飛星過水白。落月動沙虛。擇木知幽鳥。潛波想巨魚。親朋滿天地。兵甲少來書。又西閣雨望詩。樓雨霑雲幔。山寒著水城。徑添沙面出。湍減石稜生。菊蕊淒疎放。松林駐遠情。滂沱朱檻溼。萬慮傍簷楹。又夜宿西閣。曉呈袁二十一。曹長詩。城暗更籌急。樓高雨雪微。稍通綃幕霧。遠帶玉繩稀。門鵠晨光起。檣烏宿處飛。寒江流甚細。有意待人歸。○輿地紀勝

云城東有東灊水。公孫述於水濱墾稻田。因號東屯。東屯之田。可得百許頃。稻米爲蜀第一。郡給諸官俸。廩以高下爲差。帥曹月得九斗。故王龜齡詩云。少陵別業古東屯。一飯遺忠畎畝存。我輩月叨官九斗。須知粒粒是君恩。陸務觀高齋記云。少陵居夔。三徙居。皆名高齋。其詩次水門者。白帝城之高齋也。依樂餌者。灊西之高齋也。見一川者。東屯之高齋也。又云。東屯李氏居已數世。上距少陵。纔三易主。唐大歷初。破券猶在。杜甫從灊西移居屯東。詩云。白鹽危嶠北。赤甲古城東。平地一川穩。高山四面同。煙霜淒野日。航稻熟天風。人事傷蓬轉。吾將守桂叢。又東屯復灊西。一種住青溪。來往皆茅屋。淹留爲稻畦。市喧宜近利。林僻此無蹊。若訪衰翁語。須令賸客迷。又道北逢都使。高齋見一川。子能渠細石。吾亦沼清泉。枕帶還相似。柴荆卽有焉。斫畚應費日。解纜不知年。又牢落西江外。參差北戶間。久遊巴子國。臥病楚人山。幽獨移佳景。清深隔遠關。寒空見鷓鴣。回首憶朝班。關者孫遊東屯詩。呼船渡西灊。策馬行東屯。猶有竹下屋。依然柴作門。林深多鳥雀。山對有猿猴。世隔券猶在。堂非基自存。稼雲迷曠野。屏翠墮層軒。土厚疑吾里。溪清何處源。殮英金存種。飯粒玉爲根。蘆筍戀春渚。蕨芽蕃故園。山名竊諸葛。城傍爲公孫。雲雨峽前夢。琵琶山後村。留人惟野趣。隔市絕塵喧。白巽東屯行云。雨足稻畦新水滿。插秧未半青短短。馬塵追逐下關頭。北望東屯轉山坂。一川洗盡峽中想。遠浦疎林分氣象。溝塍漫漫堰源低。灘瀨泠泠石磯響。中田築場亦有廬。帶飛夏屋何渠渠。李氏之子今地主。少陵祠堂疑故居。○劉昉東屯祥雲寺行記云。紹興戊申正月。月中辭出郊勸耕至東屯。因落少陵故居祠堂之成。聞祥雲寺後有瑞石。歸路就往觀之。策杖行山澗亂

石間踰里許。石果異也。事無大小。必先難而後獲。是日自東屯還。過瞿唐。已將暮。任賓僚之去留。其同至者。趙沂詠道。文定國公才。鄧高叔誼。王鼎子新。李驥元駿。家茂秀實。張聿述之。朱齊卿醇甫。李宗臣元慶。楊譽時美。真勝實也。劉昉方明書。○辛毘曰。夔州百牢關。兵馬不可越。杜甫詩。中巴之東。巴東山。江水開關。流其間。白帝高爲三峽鎮。夔州險過百牢關。寰宇記云。三鉤鎮在州東三里。鐵鎖斷江山。橫江互張兩岸。造舟爲梁。施戰牀於上。以禦寇焉。鎮居數溪之會。故曰三鉤。唐武德二年廢。碑曰云。鑿水記碑字。但紀官名。有都押衙金吾大將軍白元曜等字。後漢書。岑彭攻江關。偏將軍魯奇應募。直衝浮橋。攢柱有反把鉤。奇船不得去。皆殊死戰。因飛炬焚之。始得入關。五代史。後唐張武石照人。仕王建爲破浪都頭。大破高季興於夔。以功陞鎮武軍節度使。武帝作鐵絙絕江中流。立於柵兩端。謂之鎖峽。宋史。太祖遣曹彬伐蜀。示以地圖。指鎖江曰。我軍泝流至此。慎勿以舟師爭勝。中興小歷云。景定五年。守將徐宗武於白帝城下巖穴設柵。江鎖七條。長二百七十七丈五尺。五千一十股。又有二鐵柱。各六尺四寸。刻徐宗武字。○志云。白帝城東十五里有勝己山。以高出衆山之上也。王十朋命名龜齡。四月二十一日。同運使周丈查丈行香報恩精舍。登佛牙樓。觀勝己山。望江流之險。飯蔬啜茗而還。因作詩云。籃輿拂曉出東關。鐘磬聲聞杳靄間。心欲報君頻入院。人逢勝己更觀山。竹香細細禪房靜。江水渾渾野渡閒。欲問漁人興與廢。黃鸝隔葉語綿蠻。劉儀鳳報恩寺詩序云。寺有唐立夫題字云。本晉鐵佛寺。有像。今徙他處。而碑記無存者。是日寺僧汲相國。泉烹香山茶甚新。因次韻奉呈安撫待制詩云。晚途無力透空關。佛土維留草數間。決去已。

會盟白水。重游仍欲住青山。皇華詩句差懷祿。儒帥封章屢乞閒。似我更宜歸計早。雨篔煙艇學漁蠻。碑
目以夔州始興寺移鐵像記爲劉禹錫撰矣。唐文若報恩寺行記云。紹興丙子七月。峽中久不雨。秋暑熾
盛。己巳晦。連夕霧霈。水復大漲。余繫舟壤中。杖策同二子輅。軫來遊。道人定觀迎謁欣然。乃漢中舊識。憩
食方丈。登佛牙閣。愛其江山鮮明。草木秀潤。頓失三峽之陋。寺本晉鐵佛院。距今八百禩。屢易而不廢。良
有以也。○寺產香山茶。因名香山寺。黃魯直香山寺行記云。太守高仲本率南昌黃魯直。挈江潭處道。同
來。遠水喬木。僧房高下。景物清絕。爲夔路第一。建中靖國元年二月庚申。微雨中來。庭墜書。○峽節。巫山
之間。有天池。浸可千頃。杜甫天池詩云。天池馬不到。嵐壁鳥纒通。百頃青雲杪。層波白石中。鬱紆騰秀氣。
蕭瑟浸寒空。直對巫山出。兼疑夏禹功。魚龍開闢有。菱芡古今同。聞道奔雷黑。初看浴日紅。飄客神女雨。
斷續楚王風。欲問支機石。如臨獻寶宮。九秋鷺雁序。萬里狎漁翁。更是無人處。誅勞任薄躬。

蜀中名勝記卷之二十二

夔州府二

巫山縣

經云江水又東烏飛水注之。注云水出天門郡淩中縣界北流逕建平郡沙渠縣南。又北流逕巫縣南。西北歷山道三百七十里。注于江。謂之烏飛口。本志云烏飛巖在西南四十里。與燕子坡相對。宋夔守王十朋詩燕子歸期近。吾今亦得歸。烏樓一枝穩。何必更高飛。自注云隔江有烏飛崖也。○經云江水又東逕巫縣故城南。註云縣故楚之巫郡也。秦省郡立縣。以隸南郡。吳孫休分爲建平郡。治巫城。城緣山爲墉。周十二里一百一十步。東西北三面皆帶傍深谷。南臨大江。故謂之夔國也。寰宇記云梁武帝廢建平郡而縣存。隋加山字。縣本夔子熊犖所治。今多熊姓。西北五十步有陽雲臺。高一百二十丈。南枕長江。楚宋玉賦云遊陽雲之臺。望高唐之觀。晉孟康註曰言其高出雲之陽也。本志云陽臺山下有土主廟。其神卽唐張巡將雷萬春。縣之跳石人也。史載令狐潮益兵圍雍丘。巡使郎將雷萬春於城上與潮相問。語未絕。賊弩射之。面中六矢而不動。潮疑其木人。使諜問之。乃驚。遙謂巡曰。向見雷將軍。方知足下軍令矣。○陸游入蜀記云二十四日早抵巫山。縣在峽中。亦壯縣也。隔江南陵山極高大。有路如綫。盤屈至絕頂。謂之一百八盤。蓋施州正路。黃魯直詩云一百八盤攜手上。至今歸夢繞羊腸。又減字木蘭花調云春水茫茫欲

渡南陵更斷腸。今有南陵渡矣。志云：廢南陵縣與陽臺相對。晉置劉宋廢。基址存。○碑曰：漢鹽鐵盆記。在巫山縣。黃太史石刻云：余弟嗣直來攝邑事。堂下有大鹽盆。有款識。蓋漢時物也。其末曰：永平二年。晉桓溫隸字碑。亦在巫山。嘉定癸未。漕使王觀之。併黃太史跋。俱徙置漕廨。王漕又作跋語。考其文爲晉周撫墓碑。今不存。○入蜀記云：日晚遊楚故離宮。俗謂之細腰宮。有一池。亦當時宮中燕遊之地。今湮沒略盡矣。本志曰：楚宮在女觀山西畔。小山頂三面皆荒山。南望江山奇麗。務觀云：又有將軍墓。東晉人也。一碑在墓後。跌陷入地。碑傾前欲壓。字纒半存。按此豈卽周益州墓耶。○戰國策：蔡靈侯飲茹溪。見莊辛幸。臣論：溪水流入城外五十步。東井志云：東井在北城外。茹溪俗名小溪也。○經云：江水又東。巫溪水注之。註云：溪水道源梁州晉興郡之宣漢縣。東入南逕建平郡泰昌縣南。又逕北井縣西。溪水又南。屈逕巫縣東。縣之東北三百步有聖泉。謂之孔子泉。其水飛清潔石穴。並高泉下注。溪水又南入于大江。王梅溪集云：縣東半里孔子泉。其旁民居童子亦能書。詩云：巫山亦有泉。可飲仍可祈。泉旁人幾家。聰慧多奇兒。○經云：江水又逕琵琶峽。本志云：琵琶峽下女子皆善吹笛。嫁時羣女子治具吹笛。唱竹枝詞。送之。梁簡文琵琶峽詩：由來歷山川。此地獨迴還。百嶺相迂蔽。千崖共隱天。橫峯時礙水。斷岸或通川。還瞻已迷向。直去復疑前。夕波照孤月。山枝斂夜烟。此時愁緒密。焚魂逝九遷。○入蜀記云：二十三夜泊清水洞。洞極深。後門自山背出色。黠闇水流其中。鮮能入者。歲旱祈雨頗應。權知巫山縣左文林郎冉徽之尉右迪功郎文庶。幾來志云：清溪在縣東十里。○經云：江水又東。逕巫峽。註云：杜宇所鑿。以通江水也。郭仲產云：

按地理志。巫山在縣西南。而今縣東有巫山。將郡縣居治無恆。故耶。三峽七百里中。兩岸連山。略無闕處。重巖疊峯。隱天蔽日。自非亭午夜分。不見曦月。至於夏水襄陵。沿沂阻絕。王命急宣。有時朝發白帝。暮到江陵。其間千二百里。雖乘奔御風。不以疾也。春冬之時。則素湍淪淪。迴清倒影。絕巘多生檉柏。懸泉瀑布。飛漱其間。清榮峻茂。良多趣味。每至晴初霜旦。林寒澗肅。常有高猿長嘯。屢引淒異。空谷傳響。哀轉久絕。故漁者歌曰。巴東三峽。巫峽長。猿鳴三聲。淚沾裳。○峽中有十二峯。曰望霞。翠屏。朝雲。松巒。集仙。聚鶴。淨壇。上昇。起雲。栖鳳。登龍。聖泉。其下卽神女廟。范成大吳船錄云。下巫山峽三十五里。至神女廟。廟前灘尤洶怒。十二峯俱在北岸。前後映帶。不能足其數。十二峯皆有名。不甚切事。不足錄。所謂陽臺。高唐觀。八云。在來鶴峯上。亦未必是神女之事。據宋玉賦。本以諷襄王。後世不察一切。以兒女褻之。今廟中石刻引墟城記。瑤姬西王母之女。稱雲華夫人。助禹驅神鬼。斬石疏波有功。見紀。今封妙用真人廟。額曰凝真觀。人蜀記云。二十三日過巫山。凝真觀。謁妙用真人祠。真人卽世所謂巫山神女也。祠正對巫山峯巒。上入霄漢。山脚直插江中。議者謂太華衡廬。皆無此奇。然十二峯者。不可悉見。所見八九峯。惟神女峯最爲纖麗。奇峭。宜爲仙真所託。祝史云。每八月十五夜。月明時。有絲竹之音。往來峯頂上。峯頂上猿皆鳴。達旦方漸止。廟後山半有石壇。平曠。傳云。夏禹見神女授符書於此。壇上觀十二峯。宛如屏幃。是日天宇晴霽。四顧無纖翳。惟神女峯上有白雲數片。如鸞鶴翔舞。徘徊久之不散。亦可異也。祠舊有烏數百。送迎客舟。自唐幽州刺史李貽詩已云。羣鳥幸胙餘矣。近乾道元年。忽不至。今絕無一鳥。不知其故。○經云。江水歷峽東。

逕新崩灘。註云。此山漢和帝永元十三年崩。晉太元二年又崩。當崩之日。水逆流百餘里。湧起數十丈。今灘上有石。或圓如葦。或方似屋。若此者甚衆。皆崩崖所損。致怒湍流。故謂之新崩灘。其頽巖所餘。比之諸嶺。尙爲竦桀。吳船錄云。自神女廟二十里至東奔灘。高浪大渦。巨艚掀舞。不當一葉。或爲渦所使。如磨之旋。三老挽招竿。叫呼力爭。以出渦矣。○水經註云。新崩灘下十餘里。有大巫山。非唯三峽所無。乃當抗峯岷峨。借嶺衡疑。其翼附羣山。並槩青雲。更就霄漢。辨其優劣耳。神血涂所處。山海經曰。夏后啓之臣曰血涂。是司神於巴。巴人訟於血涂之所。其衣有血者。執之。是謂生居山上。郭景純云。在丹山西。丹山在丹陽。屬巴丹山。西卽巫山者也。又帝女居焉。宋玉所謂天帝之季女。名曰瑤姬。未行而亡。封於巫山之臺。精魂爲草。實爲靈芝。所謂巫山之女。高唐之姬。且爲行雲。暮爲行雨。朝朝暮暮。陽臺之下。且早視之。果如其言。故爲立廟。號朝雲焉。其間首尾一百六十里。謂之巫峽。蓋因山爲名也。○金石古文云。巫山峯頂古冢。乃秦時物。邑人向萬云。尙存集古錄云。神女廟。唐李吉甫詩一首。以貞元十四年刻。邱元素一首。無刻石。年月。李貽孫二首。會昌五年刻。敬騫一首。元和五年刻。沈幼真書。其他皆無書人名氏。可摸搨。○漢樂府。巫山高云。巫山高。高以大。淮水深。難以逝。我欲東歸。害梁不爲。我集無高。曳水何梁。湯湯回回。臨水遠望。泣下沾衣。遠道之人心思。歸謂之何。齊王融。巫山高云。想像巫山高。薄暮陽臺曲。煙霞乍舒卷。蘅芳自斷續。彼美如可期。寤言紛在囑。憮然坐相思。秋風下庭綠。劉繪云。高唐與巫山。參差鬱相望。灼爍在雲間。氛氳出霞上。散雨收夕臺。行雲卷晨障。出沒不易期。嬋娟以惆悵。梁武帝云。張樂陽臺歌上謁。如寢如興。芳晻

暖容光既豔復還沒。復還沒望不來。巫山高心徘徊。元帝云。巫山高不窮。迴出荆門中。灘聲下澗石。猿鳴上逐風。樹雜山如畫。林暗澗疑空。無因謝神女。一爲出房櫳。簡文帝云。巫山七百里。巴水三迴曲。笛聲下復高。猿啼斷還續。梁沈約云。陽臺氤氳多異色。巫山高高上無極。雲來雲去常不息。常不息。夢來遊。極萬世度千秋。虞羲云。南國多奇山。荆巫獨靈異。雲雨麗以佳。陽臺千里思。勿言可再得。特美君王意。高唐一斷絕。光陰不可遲。費昶詩云。巫山光欲晚。陽臺色依依。彼美巖之曲。寧知心是非。朝雲觸石起。暮雨潤羅衣。願解千金佩。請逐大王歸。范雲云。巫山高不極。白日隱光輝。藹藹朝雲去。漠漠暮雨歸。巖懸獸無跡。林暗鳥驚飛。枕席竟誰薦。相望空依依。王泰云。迢遞巫山棟。遠天新霽時。樹交涼去遠。草合影開遲。谷深流響咽。峽近猿聲悲。只言雲雨狀。自有神仙期。陳後主云。巫山巫峽深。峭壁聳春林。風巖朝蕊落。霧嶺晚猿吟。雲來足薦枕。雨過非感琴。仙姬將夜月。度影自浮沈。蕭詮云。巫山映巫峽。高高殊未窮。猿聲不辨處。雨色詎分空。懸巖下桂月。深澗響松風。別有仙雲起。時向楚王宮。陪李孝貞云。荆門對巫峽。雲夢邇陽臺。燎火如奔電。墜石似驚雷。天寒秋水急。風靜夜猿哀。枕席無由薦。朝雲徒去來。陵敬云。巫岫鬱迢峩。高高入紫霄。白雲間抱石。元猿迴挂條。懸崖激巨浪。脆葉殞驚飈。別有陽臺處。風雨共飄飄。唐盧照隣云。巫山望不極。望望下朝氛。莫辨啼猿樹。徒看神女雲。驚濤亂水脈。驟雨暗峯文。沾裳卽此地。況復遠思君。劉方平云。楚國巫山秀。清猿日夜啼。萬重春樹合。十二碧峯齊。峽出朝雲下。江來暮雨西。陽臺歸路直。不畏向家迷。鄭世翼云。巫山凌太清。崑崙類削成。霏霏暮雨合。藹藹朝雲生。危峯入鳥道。深谷瀉猿聲。別有幽栖客。

淹留攀桂情。闕立木云君不見。巫山高半天起。絕壁千尋。畫相似。君不見。巫山磕而翠屏開。湘江碧水
遶山來。綠樹春嬌。明月峽。紅花朝覆。白雲臺。臺上朝雲無定所。此中窈窕神仙女。仙女盈盈仙骨飛。清谷
出沒有光輝。欲暮高唐行雨送。今宵定入荆王夢。荆王夢裏愛穠華。枕席初開紅帳遮。可憐欲曉啼猿處。
說道巫山是妾家。喬知之云。巫山十二峯。參差互隱見。溇陽幾千里。周覽忽已遍。想像神女姿。摘芳共珍
薦。楚雲何逶迤。紅樹日葱蒨。楚雲沒湘源。紅樹斷荆門。郢路不可見。況復夜聞猿。沈佺期云。巫山峯十二
合沓。隱昭回。俯眺琵琶峽。平看雲雨臺。古槎天外倚。瀑水日邊來。何忍啼猿夜。荆王枕席開。張九齡云。巫
山與天近。煙景常青瑩。此中楚王夢。夢得神女靈。神女去已久。白雲空冥冥。唯有巴猿嘯。哀音不可聽。李
白云。江行幾千里。海月十五圓。始經瞿塘峽。遂陟巫山巔。巫山高不窮。巴國盡所歷。日邊攀垂蘿。霞外倚
危石。飛瀑凌絕頂。極目無纖煙。卻顧失丹壑。仰觀臨青天。青天若可捫。銀漢去安在。望雲知蒼梧。記水辨
瀛海。周遊孤光晚。歷覽幽意多。積雪照空谷。悲風鳴森柯。歸途行欲曠。佳趣尙未歇。江花早啼猿。松暝已
吐月。月色何悠悠。清猿響啾啾。辭山不忍聽。揮策還孤舟。李端云。巫山十二峯。皆在碧虛中。迴合雲藏日。
霏微雨帶風。猿聲寒過澗。樹色暮連空。愁向高唐去。清秋見楚宮。張循之云。巫山高不極。合沓奇狀新。暗
谷疑風雨。幽崖若鬼神。月明三峽曙。潮滿二江春。爲問陽臺客。應知入夢人。李沈云。沒天心開地。脈浮動
凌霄。拂藍碧。襄王端眸望不及。似睹瑤姬長嘆息。巫妝不治獨西望。暗泣紅蕉抱雲帳。君王妒妾夢荆宮。
虛把金泥印仙掌。江濤迅激如相助。十二鸞龍怒行雨。崑崙謾有通天路。九峯正在天低處。李賀云。巫山

叢碧高插天。巴江翻瀾神曳烟。楚魂尋夢風颺然。晚風飛雨生苔錢。瑤姬一去一千年。丁香筇竹啼老猿。古祠近月蟾桂寒。椒花墜紅溼雲間。盧象云。高唐幾百里。雲樹接陽臺。晚見江山霽。宵聞風雨來。雷從三峽起。天向數峯開。靈境信難見。輕舟那可回。皇甫冉云。巫山見巴東。迢迢出半空。雲藏神女館。雨到楚王宮。朝暮泉聲落。寒暄樹色同。清猿不可聽。偏在九秋中。戴叔倫云。巫山峨峨高插天。危峯十二凌紫烟。瞿塘嘈嘈急如弦。洄波逆將覆船。雲梯豈可進。百丈那能牽。陸行巉崖水。不前洒淚向流水。淚歸東海邊。含愁對明月。明月空自圓。故鄉回首思綿綿。側身天地心茫然。孟郊云。巴江上峽重復重。陽臺碧削十二峯。荆王獵時逢暮雨。夜臥高邱夢神女。輕紅流烟溼豔姿。行雲飛去明星稀。目標魂斷望不見。猿啼三聲淚滴衣。陳陶云。玉峯青雲十二枝。金母和雲賜瑤姬。花宮磊珂楚宮外。列仙八面星斗垂。秀色無雙怨三峽。春風幾夢襄王獵。青鸞不在懶吹簫。斑竹題詩寄江妾。飄飄散絲巴子天。苔裳玉轡紅霞幘。歸時白帝掩青鎖。瓊枝草草遺湘烟。羅隱云。下壓重泉上千仞。香雲結夢西風緊。縱有精靈得往來。狄輓颺軒亦顛隕。嵐光巉巖雷隱隱。愁爲衣裳恨爲鬢。暮洒朝行何所之。江邊日月情無盡。珠零冷露丹墮楓。細腰長臉愁滿宮。人生對面猶異同。況在千巖萬壑中。宋蘇軾云。瞿塘迤邐盡。巫峽崢嶸起。連峯稍可怪。石色變蒼翠。天工運神巧。漸欲作奇偉。塊扎勢方深。結構意未遂。旁觀不暇瞬。步步造幽邃。蒼崖忽相逼。絕壁凜可悸。仰觀八九頂。俊爽凌顛氣。晃蕩天宇高。崩騰江水沸。孤超死不讓。直拔勇無異。攀緣見神宇。憩坐就石位。巉巖隔江波。一一問廟吏。遙觀神女容。綽約誠有以。俯首見斜髮。拖霞弄修帔。人心隨物變。遠覺含深

忌野老笑吾傍。少年嘗屢至。去隨猿獠上。反以繩索試。石筍倚孤峯。突兀殊不類。世人喜神怪。論說驚幼稚。楚賦亦虛傳。神女安有是。次問掃壇竹。云此今尙爾。枝葉紛下垂。婆婆綠鳳尾。風來自偃仰。若爲神女使。絕頂有三碑。詩曲古篆字。老人那解讀。偶見不能記。窮探到峯背。探斫黃楊子。黃楊生石上。墜瘦紋如綺。貪心去不顧。澗谷千尋絕。山高狼虎絕。深入坦無忌。洪濛草樹密。蔥蒨雲霞膩。石竇有洪泉。甘滑如流髓。終朝自盥漱。冷冽清心胃。浣衣掛樹梢。磨斧就石鼻。徘徊雲日晚。歸意念城市。不到今十年。衰老勦力憊。當時伐殘木。牙槩已如臂。忽聞老人說。終日爲嘆喟。神仙固有之。難在忘勢利。貧賤爾何愛。棄去如脫屣。嗟爾若無還。絕糧應不死。王安石云。巫山高十二峯。上有往來飄忽之猿狖。下有出沒淺澗之蛟龍。中有倚薄縹緲之神宮。神人處子冰雪容。呼風吸露虛無中。千歲寂寞無人逢。邂逅乃與襄王通。丹巖碧嶂深重重。白月如日明房櫺。象牀玉几金芙蓉。陽臺美人多楚語。只有纖腰能楚舞。爭吹鳳管鳴鼙鼓。那知襄王夢裏事。但見朝朝暮暮長雲雨。范成大云。溼雲不收烟雨霏。峽船作灘捐廟磯。杜鵑無聲猿叫斷。惟有飢鴉迎客飛。西真功高佐禹跡。斧鑿鱗皴倚天壁。上有瑤簪十二尖。下有黃湍三百尺。蔓花蚪木風烟昏。蘇珮翠微香火寒。靈游飄忽定何許。時有行人開廟門。楚客詞章元是諷。紛紛餘子空嘲弄。玉色顏顏不可干。人間錯說高唐夢。○唐王無競巫山神女廟詩。神女向高唐。巫山下夕陽。徘徊作雲雨。婉孌逐荆王。電影江前落。雷聲峽外長。霧雲無處所。臺館晚蒼蒼。劉希夷云。巫山幽陰地。神女豔陽年。襄王侗容色。落日望悠然。歸來高唐夜。金缸焰青烟。顏想臥瑤席。夢魂何翩翩。搖落殊未已。榮華倏徂遷。愁思滿湘浦。

悲涼雲夢田。猿啼秋風夜。雁飛明月天。巴歌不可聽。聽此益潺湲。張九齡云。庭樹日衰颯。風霜未云已。駕言遣憂思。乘興求相似。楚國茲故都。蘭臺有餘址。傳聞襄王世。仍立巫山祀。方此全盛時。豈無嬋娟子。色荒神女至。魂蕩宮觀啓。蔓草今如積。朝雲爲誰起。崔塗云。雙黛儼如嘯。應傷故園春。江山非舊主。雲雨是前身。夢覺傳詞客。靈猶福楚人。不知千載後。何處又爲神。溫庭筠云。黯黯閉宮殿。森森蔭薜蘿。曉峯眉上色。春水臉前波。古樹芳菲盡。扁舟離恨多。一叢斑竹夜。環珮響如何。張子容云。巫嶺召曉天。際重佳期宿。昔願相從。朝雲暮雨連天暗。神女知來第幾峯。李羣玉云。寂寞高唐別楚君。玉人天上逐行雲。停舟十二峯巒下。幽佩仙香半夜聞。又云。廟閉春山曉月光。波聲四合樹蒼蒼。自從一別襄王夢。雲雨空飛來峽長。王周云。廟前溪流潺潺。廟中修竹聲珊珊。襄王一夢杳難問。晚晴天氣歸雲閑。李商隱云。巫峽迢迢舊楚宮。至今雲雨暗丹楓。浮生盡戀人間樂。只有襄王憶夢中。又云。非關宋玉有微詞。自是襄王夢覺遲。一自高唐賦成後。楚天雲雨盡堪疑。胡曾云。楚國城池颯已空。陽臺雲雨過無蹤。何人更有襄王夢。寂寂巫山十二重。劉禹錫云。巫山十二鬱蒼蒼。片石亭亭號女郎。曉霧乍開疑卷幔。山花欲謝似殘妝。星河好夜聞清珮。雲雨歸時帶異香。何事神仙九天上。人間來就楚襄王。曹松云。巫山蒼翠夾通津。下有仙宮楚女真。不逐綵雲歸碧落。卻爲暮雨撲行人。年年舊事音容在。日日誰家夢想頻。應是荆王留不住。至今猶得覩芳塵。劉滄云。十二峯嵐挂夕暉。廟門深閉霧烟微。天高木落楚人思。山迴月殘神女歸。觸石晴雲凝翠鬢。渡江寒雨溼羅衣。嬋娟似恨襄王夢。猿叫斷巖秋蘚稀。韋莊云。亂猿啼處訪高唐。路人烟霞草木香山。

色未能忘。宋玉水聲猶似哭襄王。朝朝暮暮陽臺下。爲雨爲雲。楚國亡。惆悵廟前無限柳。春江空闔畫眉長。宋蘇軾云。大江從西來。上有千仞山。江山自環擁。恢詭富神姦。深淵鼉鼉橫。巨壑蛇龍頑。旌陽斬長蛟。雷雨移蒼灣。蜀守降老蹇。至今帶連環。縱橫若無主。蕩逸侵人寰。上帝降瑤姬。來處荆巫間。神容豈在猛。玉座幽且閒。飄簫駕風馭。弭節朝天關。倏忽巡四方。不知道里艱。古妝具法服。遂殿羅烟鬢。百神自奔走。雜沓來趨班。雲興靈怪聚。雲散鬼神還。茫茫夜潭靜。皎皎秋月變。還應搖玉珮。來聽水潺潺。蘇轍云。山中廟堂古神女。楚巫婆婆奏歌舞。空山日落悲風吹。舉手睢盱道神語。神仙潔清非世人。瓦盎傾醪薦麋脯。子知神君竟何自。西方真人古王母。飄然乘風遊九州。竭渡西海薄中土。白雲爲車駕蒼虬。騖乘湘君處。妃御天孫織綃素。非素衣裳飄飄薄。烟霧泊然冲虛自無營。朝殮屑玉嚙瓊乳。下視人世安可據。超江乘山去。無所巫山之下。江流清。偶然愛之不能去。湍岸激作聲喧。白花翻翻龍正怒。堯使大禹導九川。石隕山墜幾折股。山前恐懼久無措。稽首山下苦求助。丹書玉笈世莫窺。指示文字相爾汝。壁山洩江幸無苦。庚辰虞余實相禹。功成事定世莫知。空山俄頃千萬古。廟中擊鼓吹長簫。採蘭爲殮薰爲肴。玉缶薦芰香飄蕭。龍勺取酒注白茅。神來享之風飄飄。荒山長江何所有。豈有瓊玉薦沈寥。神君聰明無我責。爲我驅獸攘龍蛟。乘船入楚沔。巴蜀潰漩深。惡秋水高歸。來無恙。無以報。山上麥熟可作醪。神君尊貴豈待我。再拜長跪神所多。范成大云。凝真宮前十二峯。兩峯娟妙翠插空。餘峯崑秀尙多有。白壁蒼厓無數重。秋江漱石半山腹。倚天削鐵荒行蹤。造化鍾奇蟲瑤蠟。真靈擇勝深珠宮。朝雲未罷暮雲起。陰晴竟日長溟

濃。瑤姬作意送歸客。一夜收潦乃回風。仰看館御飛檝過。回首已在虛無中。惟餘烏鴉作使者。迎船送船西復東。吳宗旦云。長江出蜀初入荆。巫山十二開翠屏。雲華夫人王母女。東朝海若窺滄溟。金銀宮闕照水府。瓊瑤楹倅帝庭。江靈河伯隨班立。龍女仙娥傍輦迎。眼看日卿出暘谷。身乘氣躡返金城。玉樓一似巫峯起。颺輪略爲巫峯停。鴻濤沃天帝。憂顧重曠殛。絳禹嗣興。悲風撼石從空落。蒼崖自裂無人擊。水工叫嘯愁白日。孤臣涕泣哀空山。兩山攢束一遇聖。心驚目駭遙乞靈。傳呼侍女詔侍從。指授神策驅神兵。黃魔披髮導狂翳。童律掉舌同虞庚。朝雲暮雨滿空碧。飛鶴游龍翔太清。卻疑魍魎逞妖怪。披文寶鼎防依憑。律前面對鬼神問。禹乃悟見虛空形。昔師三元授素誓。今領元教居玉瑛。實號雲華上宮主。亦是西華少陰精。在人爲人人莫識。在物爲物物莫名。了知真仙次於聖。力披惻款祈扣扃。樓臺縵縹疊雲上。觀闕巖窠飛瑤瓊。抱關師子虬綵鬚。啓途天馬垂朱纓。靈官仙童澹容與。毒龍猛獸光晶熒。瑤臺燕坐凝玉質。龍袞拂地傳真經。汝功汝能幸及物。曰希曰夷猶未聆。欲超大海颺爲馭。欲度飛沙雲作幘。沙高無幘路將絕。海闊無馭空難騰。寶書吾來自寥廓。伏讀汝可叱幽冥。出入水火縛虎豹。倒插五星呼六丁。回眸笑指丹玉笈。素手捧出容華綾。水行乘舟山乘櫟。巨石自擘川自平。龍蟠蛇結除毒螫。巢穿穴墮蘇黎蒸。山形半破餘斧迹。鬼工斲鑿非人程。元圭帝錫彰水德。真人號位居紫庭。重瞳薦天付大寶。上日若帝仍百齡。藤蘿歲長蔭古廟。梅梁畫飛塵鐵繩。峽祠萬里跨江漢。血食千秋如弟兄。遂封真人行極妙。遠配夏后功相仍。云何肯入楚王夢。作賦翻令宋玉矜。廣寒孀妃月色瑩。藐姑處子雪肌輕。月闔嬋娟窺繡戶。

雪呈體態入疎櫺。身行天上渺無迹。夢到人間容有情。前賢摭實言語妙。今我復以歌詩鳴。晴嵐空翠不改色。迴流稽水長相縈。剪刀翦雲向空住。掃竹掃葉隨風零。仙人峩冠上玉砌。仙女舉帔搖金鈴。衆峯翼張浮翠葆。國手圖畫傳丹青。數從黃冠拜行殿。甫逐祝史祠郊坰。當街文石白珞珞。入門青蓋高亭亭。元臣授策功照耀。小儒學道心精誠。願聞祕訣換凡骨。逕參律輩騎長鯨。唐耜云。楚澤隱巫山。翠壁開鴻濛。萬流束長峽。怒浪日簸舂。朝暉潑高唐。巖阿閻彤宮。罨靄散烟霞。榮光繞長虹。恭聞雲華君。少陰體冲融。受道紫清闕。飛化凌三空。徜徉江海上。千騎馳蒼龍。羽節回天津。央央引厨峯。悽惻下主人。昏墊無所容。寶書授神禹。百靈倏奔從。蛟螭委鞭策。山川奠西東。九州免爲魚。遂成萬世功。嗟余晚聞道。蓬心蔽倥傯。維舟垂崖邊。再拜望遺蹤。嶙峋山頭石。雲衣尙溶溶。縹緲玉瑛臺。如在指顧中。童律不可問。至言誰擊蒙。仰首天壇下。松檜回悲風。宋德之云。靈均媒慮妃。喻意非法語。粵若古高辛。先禽委娥女。兩美冀必合。參差會成阻。女生願有家。士仕期致主。德協斯服從。禮失那得取。弟子頗自異。昔契今齟齬。依然憎讒嫉。正爾困狎侮。邈探姑射機。轉弄離騷杼。冥心古先后。矯志雲外侶。上述懷世知。潔身幸親附。中言天淵互。廣遠萬物祖。矧茲德不逮。開聖足自輔。進轍來羨門。禱室界公聚。太一禮既接。神人儻相遇。卒之志莫原。賴怒辭稱遽。顛倒失所依。開暝不知處。忠賢代所昧。妙麗衆目覩。微辭屏王惑。說夢癡人誤。高真乘元化。昏墊閔下土。平成啓文命。臨降枉飛馭。在楚俗則然。借秦良自喻。陳思懷抑鬱。敏識殆天付。感此致意深。濟洛獨擬賦。慮妃洎重出。鏤枕猶妄語。騷詞信非經。傳者無寡趣。真游結習盡。體道棲純素。亟除魘魅想。毋

重龍鬼怒。共罄拯民心。塗人可爲禹。范子長云。峽山多奇峯。擢秀推二六。雲谷蠡天宇。岡脈蟠地軸。晨暾照粉黛。宿雨留膏沐。岷江寄徑來。一帶幾縈曲。巖隈著叢祠。瑤席蔭嘉木。古初奉帝命。福地任司牧。疏鑿佐夏后。鬼神受要束。洪流建滄海。明德被金蜀。陋哉兒女見。幽獨在空谷。甚者雕蟲人。綺語誑流俗。女媧補天手。相望繼高躅。難以形色求。矧乃夢寐瀆。九章述明祀。千載起祇肅。若爲女岐事。天問綴篇牘。靈均尙好奇。何怪門人玉。杖藜款祠宮。采芹薦清馥。斐章同無取。聊以諗巫祝。何麒云。丹師告我巫山下。不見圖經聞古語。廟嘶白馬舞黔烏。壁掛朱猿穴蒼鼠。可憐巫子分毛鬣。豈有神仙飽葦茹。我然沈水薦寒泉。作送迎章沐雲雨。又云。玉虬旖旎懷全楚。羽帳淋漓笑神女。去去來來刺史詩。朝朝暮暮高唐雨。塵埋薛濱墟城錄。斷石斑斕讀空廡。肅然生敬攝邪心。云是瑤姬曾佐禹。冉居常云。朝雲夕雨自虛無。玉笈親得昏墊初。夏后已通三峽水。巴人誰省九天書。烟巒杳杳藏旌仗。江月沈沈想佩裾。千古文章愁宋玉。可無一字及其魚。○吳世延十二峯詩望霞峯云。披圖占勝謁雲華。初見靈峯冠綵霞。拂拭塵容開眼膜。舟人指點到仙家。翠屏峯云。四合藤蘿羽葆垂。遠烟蒙覆畫屏圍。青冥向上凝神望。似叩天關第二扉。朝雲峯云。清晨縹緲結層陰。掩映真靈洞府深。不名書丹玉笈。上清宮闕若相尋。松巒峯云。無名草木易凋零。獨立盤雲偃蓋青。任是雪霜深蔽翳。也應根柢有精靈。渠仙峯云。左鄰白帝右紅崖。中有瑤池阿母家。笑飲蟠桃丹樹下。一杯時與醉流霞。聚鶴峯云。方憐病羽困樊籠。仰見胎禽唳遠空。明月不知緱嶺夜。一聲聲入白雲中。淨壇峯云。巍巍盤石拔天成。拂拂脩篁助潔清。一息齋宮渾不寐。九霄聞徹步虛聲。上昇峯

云蓬萊方丈闕滄溟。高揖松喬。此得朋白。日青天殊不遠。瑤臺玉闕一層層。起雲峯云。油然崩寸。起叢霄。變化須臾。雨沈寥。舒卷無心。神莫測。去來誰謂。帝鄉遙。棲鳳峯云。碧梧脩竹。翠微間。刷羽朝陽。不可攀。寄跡雲林。飛有處。曾巢阿閣。邇天顏。登龍峯云。三分泉下。九淵深。直上青螺。碧玉林。怪得風雲。長庇護。有時飛作旱天霖。聖泉峯云。白崖一注。瀉青雲。練帶縈迴。玉溜奔。酖毒宴安人。不覺。誰知此物。養靈根。袁說友。巫山十二峯云。平生磊塊。山林姿。一邱一壑。貪成癡。寸峯卷石。瞥眼過。張皇攫覓。惟憂遲。東南佳山。多秀麗。就中所欠。雄與奇。仰聞巫山冠。巴峽奇峯。十二相參差。昔年圖畫。嘗一見。欲見此山。無路之。扁舟西泝。上三峽。千巖萬壑。爭追隨。終朝應接。已不暇。心目洞駭。俱忘疲。轟然鉦鼓。高唐上。峯巒二六。排旌旗。一峯霞綵。炯在望。一峯展翠。開屏帷。無心出岫。雲吐色。偃蓋平巒。松並枝。僊蹤鶴駕。羽衣近。壇石瑤臺。閭闔低。白雲一起。鳳凰下。清泉四合。咬龍嬉。羣峯角立。變態異。一一大巧。乾坤爲。外堪歎。拊試聲律。中含造化。分四時。天下名山。亦多矣。未有列岫。奇如茲。閻伯敏。十二峯詩。望霞峯云。東皇君來。流曉霞。暮看西北。王母家。雲華夫人。王母女。肯爲廟食。留三巴。翠屏峯云。秋山黃落。春山青。不識仙家。雲錦屏。六銖天衣。下拂石。香風馥郁。朝真亭。朝雲峯云。山頭行雲。自朝朝。陽臺暮色。連雲霄。朝來暮去。變雲雨。送老行客。無回棹。松巒峯云。舟船搖搖。大巫前。松間羅絲。望纒綿。屏風角轉。恰而背。心在山頭。人倚船。集仙峯云。綠蓑鞋。繫青行纜。東薪緇火。開山田。雲間仰聽。山佩響。蓬鬢拂掠。燒香烟。聚鶴峯云。望夫石。女春復秋。巴歌楚舞。隨遨頭。夜深九皋。清唳響。仙禽亦替。離人愁。淨壇峯云。山頭枝枝。竹掃壇。舟子竹枝歌。上灘。炷香上廟。擲杯環。

但乞如願舟平安。上昇峯云黃魔白馬功告成。雲華夫人朝玉京。禹王夏后引音節。高低峽船搖櫓聲。起雲峯云。釵頭嫋娜山花枝。裙尾舊纈山麻衣。朝隨雲起采薪去。暮趁女伴穿雲歸。棲鳳峯云。山頭鳳鳴來。其風山前家家背鳳篋。竹花結實未忍食。刀耕火種五里香。登龍峯云。散而成章合爲龍。回風混合游鴻濛。舟人上下神女供。俗妝鉛粉臙脂紅。聖泉峯云。靈源一派瑤池分。灑落掉石隨東奔。楚人但愛香溪水。溪邊爲有昭君村。元趙孟頫十二峯詞。疊嶂千重碧。長江一帶清。瑤臺霞冷月朧明。欹枕若爲情。雲過船窗曉星移。宿霧晴。古今離恨撥難平。惆悵峽猿聲。右淨壇峯。片月生危岫。殘霞拂翠桐。登龍峯下楚王宮。千古感遺蹤。柳色眉邊綠。花明臉上紅。欲尋靈跡阻江風。離思杳無窮。右登龍峯。松鶴堆嵐藹。陽臺枕水湄。風清月冷好花時。惆悵阻佳期。別夢遊蝴蝶。離歌怨竹枝。悠悠往事不勝悲。春恨入雙眉。右松鶴峯。雲裏高唐觀。江邊楚客舟。上昇峯月照。妝樓離思兩悠悠。雲雨千重阻。長江一帶秋。歌聲頻唱引。離愁光景恨如流。右上昇峯。絕頂朝雲散。寒江暮雨頻。楚王宮殿已成塵。過客轉傷神。月是巫娥伴。花爲宋玉隣。一聽歌調一含嚬。哀怨竹枝春。右朝雲峯。雨過蘋汀遠。雲深水國遙。渡頭齊舉木蘭橈。織殺楚宮腰。映水勻紅臉。假花整翠翹。行人倚棹正無聊。一望一魂銷。右集仙峯。碧水鴛鴦浴。平沙荳蔻紅。望霞峯翠一重重。帆卸落花風。澹薄雲籠月。霏微雨灑篷。孤舟晚泊浪雲中。無處問音容。右望霞峯。芍藥虛投贈。丁香漫結愁。鳳棲鸞去兩悠悠。新恨快逢秋。山色驚心碧。江聲入夢流。何時絃管簇。歸舟蘭棹泊沙頭。右棲鳳峯。碧水澄青黛。危峯聳翠屏。竹枝歌怨月三更。別是斷腸聲。烟外黃牛峽。雲邊白帝城。扁舟清夜泊蘋汀。倚棹

不勝情。右翠屏峯。鶴信三山遠。羅裙片水深。高唐春夢杳。難尋惆悵至今。十二峯前月。三千里外心。紅
牋錦字信沈沈。腸斷舊香衾。右聚鶴峯。曉色飄紅豆。平沙枕碧流。泉聲雲影弄新秋。觸處是離愁。臉淚橫
波淡。眉攢片月收。佳人無笑口。難休來整玉搔頭。右聖泉峯。曼娜江邊柳。飄飄嶺上雲。卸帆迴棹楚江濱。
歸信夜來聞。欲拂珊瑚枕。先熏翡翠裙。江頭含笑去。迎君鸞鳳畫成羣。右起雲峯。○隋崔仲方夜宿巫山
詩。荆門秋水急。巫峽斷雲輕。若爲教月夜。長短聽猿聲。楊炯過巫峽詩。三峽七百里。唯言巫峽長。重巖宵
不極。疊嶂凌蒼蒼。絕壁橫天險。莓苔爛錦章。入夜分明見。無風波浪狂。又云。忠信吾所蹈。泛舟亦何傷。可
以涉砥柱。可以浮呂梁。美人今何在。靈芝徒有芳。山空夜猿嘯。征客淚沾裳。沈佺期十三四時嘗過巫峽
他日偶然有思。作小度巫山峽。荆南春欲分。使君灘上草。神女廟前雲。樹悉江中見。猿多天外聞。別來如
夢裏。一想一氛氲。崔灑寄盧八象云。客從巴水渡。傳爾泝行舟。是日風波霽。高唐雨半收。青山滿蜀道。綠
水向荊州。不作書相問。誰能慰別愁。李白宿巫山下云。昨夜巫山下。猿聲夢裏長。桃花飛綠水。三月下瞿
唐。雨色風吹去。南行拂楚王。高邱懷宋玉。訪古一沾裳。岑參下峽舟懷終南舊居云。杉冷曉猿悲。楚客心
欲絕。孤舟巴山雨。萬里陽臺月。水宿已淹時。蘆花白如雪。顏容老難頽。把鏡悲鬢髮。早年好金丹。方士傳
口訣。敝廬終南下。久與真侶別。道書誰更開。藥竈烟遂滅。頃來厭塵網。安得有仙骨。巖壑歸去來。公卿是
何物。皎然宿巴峽云。江聲五千里。瀉碧急於絃。不覺日又夜。爭教人少年。一汀巫峽月。兩岸子規天。山影
似相伴。濃遮到曉船。李頻過巫峽云。擁棹向驚湍。巫峯直上看。削成從水底。聳出在雲端。暮雨晴時少。啼

猿渴下難。一聞神女去。風竹掃空壇。崔塗巫山旅別云。五千里外三年客。十二峯前一望秋。無限別魂歸不得。夕陽西下水東流。盧綸巫山竹枝云。十二峯頭月欲低。空舸灘上子規啼。孤舟一夜東歸客。泣向春風憶建谿。徐凝荆巫夢思云。楚水白波風嫋嫋。荆門暮色雨瀟瀟。相思合眼夢何處。十二峯高巴字遙。陸龜蒙過巫峽云。巫峽七百里。巫山十二重。年年自雲雨。環珮竟誰逢。蘇軾出峽云。入峽喜巉巖。出峽愛平曠。吾心淡無累。遇境卽安暢。東西徑千里。勝處頗屢訪。幽尋遠無厭。高絕每先上。前詩尙遺略。不錄久恐忘。憶從巫廟回。中路寒泉漲。汲歸真可愛。翠碧光滿盎。忽驚巫峽尾。巖腹有穿壙。仰見天蒼蒼。石室開南嚮。宣尼古廟宇。叢木作幃帳。鐵楯橫半空。俯瞰不計丈。古人誰架構。下有不測浪。石竇見天困。瓦棺悲古葬。新灘阻風雪。村落去攜杖。亦到龍馬溪。茆屋沾村釀。玉虛悔不至。實爲舟人誑。聞道石最奇。寤寐見怪狀。峽山富奇偉。得一知幾喪。苦恨不知名。歷歷但想像。今朝脫重險。楚水渺平蕩。魚多客庖足。風順行意王。追思偶成篇。聊助舟人唱。鄧諫從題巫山瞻華亭云。峻嶒玉削三千丈。翠潑嵐光冷相向。風含太古雲氣長。變化溟濛紛萬象。陰晴一日具四時。天籟壑深虛自響。神山娟妙擢羣參。錦繡鋪張獻奇狀。蟠根積鐵匯百川。龍矯蛟繚饒跌宕。勢連三楚此開國。故壘荒宮帶溪瀼。樓臺井邑老風烟。環珮清聞駐仙仗。竹林風味便讀易。久與江山爲輩行。鳴絃餘暇豁心眼。戲著飛欄雲雨上。爽明自可達壑蔽。野獲又何勞草創。政和民氣長似春。景迴心平過於掌。征鴻明滅志何杳。黃鵠追隨意尤放。當年李杜經行處。太史銀鉤刻青嶂。寶刀珠瑟出耕墾。曲水纖腰迷草莽。牢盆古隸雜秦篆。飛動閑摹永平樣。珊瑚交柯炯不蝕。髣髴

將軍勳業壯。英雄繁盛隨流水。時有竹枝賡牧唱。孔泉文物起騷經。國色明妃守孤尙。我家峨帽紫翠間。爲愛奇峯甘菟醬。秋風野水憶絲尊。擊汰夷猶理烟榜。李埴離巫山晚泊棹石灘。下云黃昏風雨阻江濱。翠綰羣峯暮色勻。一夜子規啼到曉。孤舟愁殺未歸人。

蜀中名勝記卷之二十三

夔州府三

達州

州以元微之左遷司馬著名。方輿勝覽有勝江亭在州西三里。乃郡守王蕃讀白樂天寄微之詩云。達州猶似勝江州。因以名亭也。長慶集微之到通州日。授館未安。塵壁間有數行字。乃是僕十五年前初及第時贈長安妓阿軟絕句。緬思往事杳若夢中。懷舊感今。因誦長句。呈白居易詩云。十五年前似夢遊。曾將詩句結風流。昔教紅袖佳人唱。今遣青衫司馬愁。又見樂天詩云。通州到日日平西。江館無人虎印泥。忽向破簷殘漏處。見君詩在柱心題。其間酬唱甚多。未可殫述。○當時有李景信者。自長安來訪。周旋少日而別焉。微之有李十一景信到詩云。何事相逢翻有淚。念君緣我到通州。留君賸住君須住。我不自由君自由。又有丁溪館別景信詩云。京城每與閑人別。猶自傷心欲白頭。今日別君心更苦。別君緣是在通州。○陳昇翠玉軒序。通川之境。東瀉巴渠。西峙鐵嶺。南對夏雲。北望鳳山。寰宇記云。巴渠江在石鼓縣南四十步。流入通州界。江中有南昌灘。元微之南昌灘詩云。渠江明淨峽逶迤。船到名灘拽筴遲。櫓竅動搖妨作夢。巴童指點笑吟詩。畚餘宿麥黃山腹。日背殘花白水湄。物色可憐心莫恨。此行都是獨行時。○志云。鐵山在州西二十里。石色如鐵。上有獅子石和尚巖諸勝。蓋迢遞自石城來者。山四面絕崖。西有一路登

頂寰宇記云。後魏廢帝二年。開拓山南。改宣漢爲石城。從山名也。○輿地紀勝云。翠屏山橫列州南。元徽之建夏雲亭其上。山北又有流水寺。巨石刻成殿形。餘址蕪沒。惟佛像屹立江邊。○寰宇記云。鳳凰山在通川縣北五里。山形鳳翅。掩映州城。有梧桐坪。寶芝洞諸勝。洞中石乳成峯。玲瓏如刻鏤。又有砥石縱橫丈餘。鑿爲曲道。可以流觴。志云。鳳山有呂公聖相傳。呂純陽幻形乞食。寺僧知而蹤跡之。逐雲影冉冉逝矣。○輿地碑曰。漢車騎將軍馮緄碑在永睦縣之西八十里。緄薨於桓帝之永康元年。文尙瞭然可讀。其父煥亦有兩碑。斷裂不全。僅存大概。又云。有漢廣漢蜀國侯李翊及蜀國侯夫人墓銘。翊以靈帝熹平二年卒。夫人不著姓氏。疑其爲臧字。首尾亦不刊缺。又云。書字巖碑。在巴渠縣西十里。多斷缺。不成文理。間存晉昌太守字。按晉孝武方立晉昌郡。則此必東晉以後人碑耳。又云。唐處士墓碑。在州城北十五里。楊斗壩馬腦鼻山下。乃唐景龍二年刻。字畫逾媚如歐柳。可愛。又云。元稹告畚三陽神文。元和志載在通川縣之華陽觀。又云。廣福院修福殿記。在永睦縣。卽唐福田寺。有會昌三年王欽說修福殿記。又云。瀘潭院鐫佛記。在通川縣東富教里岸側石上。乃唐人所鐫。傍有中和造像人姓名百餘。字多漫滅。又有黃山谷贈通川令韓廣叔碑文。廣叔赴通川日。魯直以言贈之曰。惟勤能辦公家。惟清能律貪吏。嚴而信。則吏不病民。簡而敏。則民多在野。又有趙節婦碑。節婦姓趙氏。嫠居。有兒人欲犯之。脅以白刃。節婦不爲動。旣而誘以百端。終不可。遂刺殺之。時皇祐二年。知州薛侏憇其節爲之立碑於達州之西北山上。後邑令薛仲侃。剏祠繪像於中。

東鄉縣

治南有石鼓橫江上。爲石鼓鎮。楚春申君之花果園也。寰宇記云。唐析石鼓縣之西鄉地。在東關水北五十步。置巴渠縣。紀勝云。舊巴渠縣。後鹿子山漢樊噲嘗屯兵于此。四夷述云。唐武德中。移東鄉縣治於今縣東一里安養故城。○寰宇記云。萬戶溪在巴渠縣東八十里。自開州萬壽縣界。北流來合。縣溉江水。又有成熟溪。亦自開州萬壽縣來合。文字溪。紀勝云。西北四十里。崖壁間懸二石。左類日。右類月。月中空隙有娑羅樹一株。

太平縣

舊明通縣地也。勝覽云。丙穴在明通縣井峽中。其穴凡十。其中皆產嘉魚。春社之前。魚卽出穴。秋社旋歸。其出也。止于巴渠龍脊灘。首有黑點。謂照映星象相感而成。長身細鱗。肉白如玉。其味自鹹。蓋食鹽泉也。○紀勝云。太平東七里有龍潭。羣峯環拱。凡七十二。浦會合。凡四十八。渚而匯爲潭。廣餘百畝。其深叵測。實爲龍鰐。又云。東北八十里萬頃池。是春申君故居。旁有平田萬頃。鄰邑諸水源皆出于此。

新甯縣

寰宇記云。故新甯城在縣西北十里。後魏恭帝二年於此立縣。隋開皇三年廢。唐武德二年又置。後遷於賓城。通志云。宋更爲三岡縣。至道中。移治於新安市。元至元初。復稱新甯矣。○紀勝云。新甯南十里有黃茅嶺。卽古詩所稱猿聲時下斷。月色好平看也。

梁山縣

邑名高粱。又曰都梁。皆因山也。寰宇記云：高粱大山在縣北四十里。尋江源記云：高粱山東尾跨江西。劍閣東西數千里。山嶺長峻。其峯崔嵬於蜀市。望之若長雲垂天。一日行之。乃極其頂。俯視衆山。泯若平原。劍閣銘所謂巖巖梁山。積石峨峨者也。張文琮蜀道難詩：梁山鎮地險。積石阻雲端矣。輿地紀勝云：都梁又名高都。在縣治北十五里。舊有高都驛。乃天寶進荔枝之路也。山壤腴而黃。其民多業種薑。○寰宇記云：本漢胸臆地也。後魏廢帝分胸臆置魚泉縣。今縣卽魚泉縣。地以丙穴嘉魚爲名。尋江源記云：丙穴有嘉魚。其味甚美。水出柏枝山。在縣東南十五里是也。方輿勝覽云：五代僞蜀在今軍治置務。曰石氏屯田務。宋開寶初。土豪石處質納庄田八所。遂廢田務。移縣於此。因陞爲軍。劉煥題名序。稻田蕃廩。常多豐年矣。○紀勝云：垂霞樓在子城之北。左瞰萬石。右倚東山。景物奇麗。峽中未有。又有瑞豐亭。陸務觀詩：峽中地偏常苦貧。政令愈簡民愈淳。本來無事只畏擾。擾者才吏非庸人。都梁之人猶無苦。須晴得晴雨。得雨父老羅拜豐年賜。縱產芝房非上瑞。○勝覽云：峯門山在軍東十五里。其山高大。頂有寒泉。兩岸對峙如門也。○又云：蟠龍山在城東二十里。孤峙秀傑。突出衆山之上。下有二洞。洞有二石。龍狀。首尾相蟠。故名。旁曰噴霧巖。洞中之泉下注。垂崖約二百餘丈。噴薄如霧。張無盡留題云：水味甘腴。偏宜煮茗。非陸羽莫能辨。范石湖以爲天下瀑布第一。有飛練亭。與之相對。舊取徐凝詩句。東坡以爲惡。乃易名飛雪亭。取歐陽公所稱六月飛雪灑石矸矣。魏了翁飛雪亭詩云：自荆入蜀路險絕。黑猿聲中膽欲折。萬州江頭舍

舟楫。又趣擔簦窮岷嶽。危磴連雲如積鐵。亂石砭足十九跌。僕夫流汗馬止舌。遙望蟠龍掛天脇。懸瀑落巖噴霏屑。中間有亭曰飛雪。十里陰風寒入髮。人言此地無六月。呼取大斗酌甘潔。一飲令君消內熱。予以壬子歲再過此。作詩云。春水三年別。寒聲十里聞。鶯花流出洞。樹石掛成文。有意同高潔。無心作使君。前車行度險。予且坐斜曛。按蟠龍洞古碑云。張卞爲蜀將。先主攻固陵。諫不聽。乃入山修真。遇樵叟。自稱鷓夷人。授之丹訣。得道矣。○碑目又云。舊梁山驛碑。在軍東四十里。耆舊相傳。李唐時有白虎蛟龍爲民害。民至遷居以避。韓昌黎嘗按部經行。二害乃去。作碑識之。今名其地爲碑坳。碑猶存于溪側。字漫滅不可復識。又有唐碑題云。令長新誠之記。乃明皇御製。梁山令尹茂元得於萬州守河東裴公而刻之。蓋大中十年也。嘉定丁卯。郡守李錫移於軍治。其詞云。我求令長。保乂下民。民之不安。必有所因。侵漁寢廣。賦役不均。使夫離散。莫保其身。徵諸善理。寄爾良臣。與之革故。政在維新。調風變俗。背僞歸真。教化爲先。惠卹於貧。無小無大。必躬必親。青旌勸農。孰不攸遵。曷云被之。我澤如春。此碑原在舊驛中。○勝覽云。書院峽在軍東五十里。峽石市之北。每風雨冥冥。如聞讀書聲。故其中有夫子崖。子貢壩。峽下有坐臥石塔。按夫子子貢。韓退之皆未嘗至蜀。此必附會之說也。○勝覽云。寒泉洞在軍之西。龍鎮十里許。有洞曰寒泉。○紀勝云。軍西二十里赤牛山覺林院之東。有一石龕。琢石爲大悲像。四十二手皆有所執。碑目云。赤牛城有石刻。淳祐二年上元落成。週三百六十步。敵樓百四十三座。四門各有廢刻壇壝將臺。各基址猶存。○紀勝又云。縣西五十里多喜山。時有神光現。見之多獲喜事。故名。陳希夷曾居此。丹爐石枕俱存。有雌

雄泉。春夏左盈右竭。秋冬左竭右盈。古志識云。東有飛龍。西有赤牛。文必拜相。武必封侯。按飛龍。卽蟠龍山。赤牛。卽牛頭寨也。宋張無盡拜相。漢張卞至唐時始封廣澤侯矣。○紀勝又云。金鳳山拒軍西五十里。楊市之北。其山之南。半崖有罅。邃然。內皆洞明。其石上有若圖仙女狀。面貌儼然。時若動搖。迫而視之。則不見。○又云。軍西七十里。落雲潭。常有雲覆其上。他日漁者拋網。得一石老君。自此不復有雲氣。像在永安市民冉氏園中。背有字。曰天漢二年刻也。○寰宇記云。石瓦山在縣西百一十三里。山巔有古人礪刀劍。亂石如積瓦焉。紀勝云。瓦城山在軍西百二十里。圖經亦曰。石瓦山山下有古欄楯蹤迹。屈曲至于山上。其巔平坦。耕者往往得古銅片。○紀勝又云。軍西百四十里。筆山。卽白雲山也。奇峯如筆。故云。宋張無盡詩。白雲山上揖世尊。各以願力濟羣生。卽此。予以萬曆己酉歲登峯。上卽別寄題詩云。似筆挺然秀。山川亦好文。宕渠花裏出。秦嶺竹間分。石臼生春水。香龕積暮雲。經過難久住。日後覺離羣。壬子歲再過。此作詩云。霧到此中止。分明要客登。水田開四野。松石閉孤僧。步入禪鐘慣。詩題綵筆曾。稍紆行役苦。惟有勝緣能。○寰宇記有逢溪山。云在縣南八十步。水西南流入忠州桂溪縣界。○通川志云。浮蘭碑載梁山軍忠州兩界。舊有漢刻石。署白虎夷王姓名。今其上刻漢時官屬。及白虎夷王及時民等姓名。尙有可考。碑目云。五大夫碑在梁山軍界上。字雖漫滅。然乃漢隸也。○夷堅雜錄云。梁山有漢武帝祠。至今祭時。往往有一二百蝴蝶降祠所。享其食。近之不驚。徹饌然後羣去。時謂武帝侍從捉之者。必致病。按常璩云。益州刺史毀蜀中山川神祠。取其松柏爲舟船。惟不毀漢武帝祠。則蜀之祠武帝久矣。○紀勝云。梁山呂保

藏家高崖峭絕。半腹有一穴。漢赤眉之亂。邑人呂保藏家貲巨萬。鑿石以居。寇不能近。後舉家隱焉。宋紹熙中有樵夫得一券於崖側。非銅非鐵。其聲鏘然。上有古篆云。西漢之末。赤眉邂逅。黃金千兩。坑埋而走。羔豚十祭。其財自阜。今藏所猶存。

萬縣

華陽國志。巴東郡南浦縣在郡南三百里。晉初置主夷。又云。晉武帝平吳之後。巴東省羊渠置南浦。按南浦在縣南岸。蜀志建安二十一年。先主分胸臆之東南界。立當縣。故其西四里。天子城。相傳昭烈駐兵于此。常璩所云小石城是也。三面峭壁。惟山後長延一脊。容徑尺許。累石爲門矣。○羊渠。漢縣也。通志云。萬縣西五十里。羊飛山。相傳有道人令童子牧羊。戒使勿放。一日童子放之。其羊冲天而去。按蜀鑿羊飛山下有羊渠縣。卽此。○縣南百二十里。又有廢武甯縣。後周建德所立。唐王周過武甯縣。詩云。行過武甯縣。初晴物景和。岸迴驚水急。山淺見天多。細草濃藍潑。輕烟匹練拖。晚來何處宿。一笛起漁歌。○輿地紀勝云。武甯縣西一里許。旌陽舊宅。卽今之白鶴寺也。宋大章未嘗讀神仙傳。疑而不信。新都宰張澤語之曰。許遜本潭人。曾任蜀之旌陽令。雅顧此山。因有別業。亦何疑乎。○一統志載萬縣西百里有木樨山。昔大禹治水過此。見衆山漂沒。惟此山木樨不動。故名。寰宇記云。在武甯縣東南十三里。山頂有池。淺深隨江水漲減。以地里合之。是矣。樂史又云。石筍山在縣東北三十五里。其狀如筍。舟過漕溪。瀼塗之間。見之恫目焉。○水經曰。江水又東。逕瀼塗。而歷胡灘。又東。逕界壇。註云。是地巴東之西界。益州之東界也。按瀼塗

驛在當縣南六十里。江中有石似胡人，名曰胡灘。飛瀑湍流，其勢險急。杜少陵詩：不是怕胡灘者此矣。亦今上下川東之界也。○經云：江水又東南會北集渠。註云：二溪水涪陵縣界，謂之于陽溪。北流逕巴東郡之南浦，僑縣西溪夾側，鹽井三口，相去各數十步，以木爲桶，徑五尺，修煮不絕。水北流注於江，謂之南集渠口。亦曰于陽溪口。北水出新浦縣北高梁山，分溪南水逕其縣西，又南一百里入胸臆縣。南入于江，謂之北集渠口。別名班口。又曰分水口。胸臆尉治此。按分水驛在當縣西南八十里。此水由天生橋而出，方輿勝覽云：天生橋在州西苧溪上，乃一巨石自然成橋，長與溪等，平闊如履平地。溪流出其下矣。○經云：江水又東逕石龍。註云：水至于博陽二村之間，有盤石廣四百丈，長六里而復殆于岨，奉江川夏沒冬出，基互通渚。按此縣西之盤龍磧也。江岸中有黃金沱，蛾眉磧，古練石，皆以形似得名。碑曰云：隋朝寶像記在古練巖矣。○陳子昂萬州曉發放舟乘漲還寄蜀中親朋詩：空濛巖雨霽，爛漫曉雲歸。嘯旅乘明發，奔機驚斷磑。蒼茫林岫轉，絡繹漲濤飛。遠岸孤烟出，遙峯曙日微。前瞻未能胸，坐望已相依。曲直多今古，經過失是非。還期方浩浩，征驪日騑騑。寄謝千金子，江海事多違。王周萬州公居詩：公居門館靜，旅寄萬州城。山共秋烟紫，霜并夜月清。無愁干酒律，有句入詩評。何必須林下，方馳吏隱名。劉長卿寄萬州崔使君令欽詩：時艱方用武，儒者任浮沈。搖落秋江暮，憐君巴峽深。王門多白首，蜀郡滿青襟。自解書生詠，愁猿莫夜吟。鄭谷寄南浦謫官詩：多才翻得罪，天末抱窮憂。白首爲遷客，青山遠萬州。醉疑梅嶂曉，歌壓竹枝秋。望闕懷鄉淚，荆江水共流。范成大萬州詩：晨炊維下巖，晚酌艤南浦。波心照州榜，雲腳響衙鼓。前山如

屏牆得得正當戶。西江朝宗來。循屏復東去。官曹倚巖棲。市井喚船渡。瓦屋仄石磴。猿啼鬧人語。剔核杏餘酸。連枝茶臍苦。窮鄉固瘠薄。陋俗亦寒窶。營營謀食艱。寂寂懷甄訴。昔聞吏隱名。今識吏隱處。自注云。此萬州之實境。非親到者不知其語之工也。○紀勝云。縣西有太白巖。在西北山上。卽絕塵龕也。碑目云。絕塵龕三字。在西山石壁。字體清勁。類晉宋間人書。有唐人詩刻。相傳以太白讀書於此。巖下有池。宋郡守馬元穎。魯有開所鑿。廣一畝。植以芙蕖。荔枝。雜果。凡三百本。有勒封院。黃魯直記云。庭堅蒙恩東歸。道出南浦。太守高仲本置酒西山。實與其從事譚處道俱來。西山者。由郡西渡大壑。稍陟山半。松柏蒼翳。水泉潑爲大湖。亭榭環之。有僧舍五區。其都名曰勒封院。樓觀重複。出沒烟霏之間。而光影在水。邦之人歲修禊事於此。凡夔州一道。東望大壑。西盡郁郢。林泉之勝。莫與南浦爭長者也。寺僧文照喜事。作東西二堂於茂林脩竹之間。仲本以爲不奢不陋。冬煖而夏涼。宜於遊觀也。建中靖國元年二月辛酉。江西黃魯直題張俞宴萬州西山池亭柬魯使君詩。西嶺鬱盤紆。寒泉注原隰。下有乖龍池。何年此殊極。復爲鼉鼉據。亂我清泉色。松榦已交摧。石牙空鬪立。魯侯獨窮勝。無事日尋陟。蕩滌潢汙流。宛如疏鑿力。池光復涵澈。萬象皆鏡入。亭觀出浮雲。彤彤映邦域。左右浮屠宮。歸然爭巖岌。昔乃荆棘荒。今爲蕙蘭襲。密樹低華陰。嘉禽弄文翼。使君池上宴。何減襄陽習。又題西山臨江亭詩。南浦逢除日。天涯有去舟。蠻城和雨閉。峽水帶春流。不負新年感。惟多故國愁。甯無賀春酒。徒此事羈囚。○勝覽云。岑公洞在大江之南。廣六十餘丈。深四十餘丈。石巖盤結如華蓋。左右方池。有泉湧出。巖簷遇盛夏。注水如簾。松篁藤蘿。鬱蔥蒼翠。真神仙。

窟也。圖經云。岑公名道願。本江陵人。隋末避地隱此巖下。百餘歲。肌膚若冰雪。積二十年。尸解去。碑目云。岑先生銘。唐巖挺之撰。開元二年立。又有段文昌銘。貞元三年四月十五日。鑄。唐刺史馬冉詩云。南溪有仙澗。咫尺非人間。泠泠松風下。日暮空蒼山。宋趙善贍詩。真人逸何之。恍惚不可見。洞居獨嵌空。壁溜明珠濺。藤蘿含溟濛。竹柏鬪蔥蒨。至幽合人心。遠翠落江面。野老乘籃輿。使君肆清燕。日影砌下倒。雲谷坐間變。大木巖欲傾。邃壑路微轉。崢嶸施屏風。點綴成彩絢。雖云急行樂。勝賞殆亦遍。欲歸重盤旋。拂石看古篆。郭印詩。岑公來避世。甲子十周年。夏屋虛巖豁。神芝結蕊懸。木喬從古種。香杏至今傳。學道能堅忍。何人不得仙。宋徽宗政和五年四月二十一日。幸徐常廬。因念逾期未歸。信筆立成一絕。可知常詳茲眷意。庶速西上也。詩云。人生何事厭羈塵。汎宅浮家冬復春。今日暫來猿鶴語。他年應召白雲人。黃庭堅建中靖國元年三月。萬守高仲本宿約遊岑公洞。夜雨達旦。戲贈二小詩云。肩輿欲到岑公洞。正怯衝泥傍險行。應是岑公闕清境。春江一夜雨連明。又蓬窗高枕雨如澠。恰似槽牀壓酒聲。今日岑公不能飲。吾儂強健可頻傾。范仲黼詩。石壁虛涵雲氣深。水簾蔌蔌墜璆琳。客來但愛幽棲好。誰識岑公萬古心。趙希混詩。自有烟霞護石扉。更深曉色近清暉。巖前老檜吟風處。似請仙翁化鶴歸。○碑目云。萬州虛鑿真人贊。朝請大夫知襄州軍州兼管內勸農事提舉房隨郢州兵馬巡檢公事柱國借紫岑象求撰文。陽翟李薦書丹。南京進士戚達題額。奉議郎權知萬州軍州兼管內勸農事武騎尉賜緋借紫蓋休景立石于元符元年。又云。宣和中。道君皇帝御書。出州妙庭觀岑洞碑。紹興二十八年二月朔。右朝請大夫權發遣萬州

軍州主管學事兼管內勸農借紫臣李莘民述記。冲妙大師前敕差充萬州道正主管教門公事賜紫臣再通明立石。已上諸碑。予以癸丑歲二月歸舟。遍訪而揚之。○圖經云。峽中漢刻少。今萬州報恩寺有碑高五尺。乃漢桓帝延熹間所刻石。凡百餘字。土人謂之宜子碑。○紀勝云。西南三里壽寧觀。有唐太宗明皇銅真像。治北集虛觀。有唐垂拱時碑。○碑目云。萬利廟碑。乾德乙丑。白廷誨爲刺史重修。距今二百三十餘年。漫滅不可讀。又云。白刺史題名記。開寶二年九月記。同時僚佐姓名在州萬利廟。有碑。仆草莽中。考閱得之。字皆漫滅。獨白刺史名在。○碑目又云。大雲寺碑。有唐僧圓澤傳。及元和間萬州守李裁書聖業院碑。在周溪大江之濱。三生石旁。蘇封可見者。咸通三年壬子歲十一月建十餘字耳。按周溪在縣東四十里。忠義傳載李源道人再生事。詩云。三生石上舊精魂。賞月吟風不要論。慚愧情人遠相訪。此身雖異性常存。又身前身後事茫茫。欲話因緣恐斷腸。吳越山川尋已遍。却迴烟霧上瞿塘。冷齋夜話云。此僧贊寧所記。東坡以爲卽圓澤也。○經云。江水又東。彭水注之。註云。水出巴渠郡獠中。東南流逕漢豐縣東。清水注之。水道源出西北巴渠縣東北巴嶺南獠中。卽巴渠水也。西南流至其縣。又西入峽檀井。溪水出焉。又西過山。至漢豐縣東。而西注彭溪。謂之清水口。彭溪又入逕胸臆縣西六十里。南流至於江。謂之彭溪口。按在縣東八十里巴陽驛。是俗名小江。舊小彭驛設焉。紀勝云。小彭驛邊有二石虎。高五尺。各有四翅。石刻詩云。巍巍二虎一塵埋。巨石鐫成尙有痕。只此也須防夜箭。灞陵恐遇李將軍。蓋一尉題。俗稱石麒麟云。

雲陽縣

經云。江水又東。右逕胸臆縣故城南。註引常璩曰。縣在巴東郡西二百九十里。縣治故城跨其山阪。南臨大江之南。岸有方山。山形方峭。枕側江漬矣。輿地紀勝。胸臆城本漢縣。在萬戶城西。固陵集載李燾胸臆記云。余泊舟雲安之西三十里。萬戶驛下橫石灘上。土人云。今驛之左右。則胸臆故城也。仁父又有曲水留題云。或言雲安之西三十里許。有自然曲水。閏月甲午朔。泊舟橫石灘上。攜子。屋。堊。壁。塋。及劉甥卞子道。子步訪之。水極浚急。不可流觴。巖巔有永和三年及六年刻字十五六行。剝落已不可讀。細辨其文。但昔人捐金以事仙佛。識金數於石耳。殆非禊飲處也。好事者因年號遂增飾之。當時必置屋廬像設。今變滅無餘。然水石要可喜。取酒酌其旁。賞晤良久。乃去。輿地碑目云。夔州守楊輔去官。過萬戶驛。故胸臆縣治。泊舟游古書巖。見刻石滿其上。意當時或有像設屋室。蓋縣人常所往來之地。縣徙。歲月不復可考。而石刻亦漫闕就盡。說者但有臆創。乃屬雲安大夫劉甲徧募巖上下石刻。試考詳之。庶幾其猶有獲也。同來者雲安大夫鄭邦基。郝奚仲。從姪有聲。淳熙十五年八月十六日。按橫石灘。今之橫梁候館設焉。萬戶驛卽萬戶壩。去縣西四十里。○萬戶驛北有漢城山。乃漢扶嘉所居。按扶嘉。胸臆人也。初。嘉母於湯溪側。遇龍後生嘉。巧發奇中。高祖爲漢王。與嘉相遇。獻定三秦策。高祖以其志在扶翊。賜姓扶氏。爲廷尉。臨終有言云。三牛對馬嶺。不出貴人出鹽井。按馬嶺在縣北三十里。三牛在縣北二十里。皆近鹽井。監矣。○經云。江水又逕魚復縣之故陵。註云。舊郡治故陵溪西二里之故陵村溪。卽永谷也。地多木瓜樹。有子。

大如鮫白黃實甚芬香爾雅之所謂楸也。經云江水又東爲落牛灘。逕故陵北。註云江側有六大墳。庾仲雍曰楚都丹陽所葬亦猶枳之巴陵矣。故以故陵爲名也。有魚復尉戍。此江之左岸有巴鄉村。村人善釀。故俗稱巴鄉清郡出名酒。村側有溪。溪中多靈壽木。中有魚其頭似羊。豐肉少骨。美於餘魚。溪水伏流。逕平頭山。內通南浦。故縣陂湖。其地平曠。有湖澤。中有菱芡鯽鴈。不異外江。凡此等物。入峽所無。按故陵者。卽古陵沱也。酈道元以爲舊郡治。今名舊縣壩矣。碑目云漢處士金廣延母子碑。初無文字。但有人物。又有一碑。所勒皆車馬人物。或云古者修車馬備器械之圖。此皆在舊雲安郡也。○寰宇記云使君灘在軍東二里大江中。昔楊亮爲益州。至此舟覆。徵其波瀾。蜀人至今猶名之爲使君灘。一曰博望灘。荊州記云張騫奉使西域。於此覆舟。亦名使君灘。乃在今縣之西矣。○江中又有龍脊灘。形如遊龍。歲人日。邑人遊於上。以雞子卜歲豐凶。古謠云龍牀如拭。濟舟必吉。龍牀彷彿。濟舟必沒。宋馮時行龍脊灘留題云。建炎戊申正月上巳日。判官李造道。司戶趙執權。知縣母邱元望。縣尉馮當可。陪郡侯謁武烈公祠。遂泛江而下。散步此磧。老杜詩云。元日逢人日。未有不陰時。議者謂天寶之季。此詩盡之。今日天宇清明。江國熙然。太平之期。指日可俟。江獲與諸公偕遊。所謂人日也。馮當可書。○杜詩東城抱春岑。江閣鄰石面。崔嵬晨雲白。朝旭射芳甸。唐詩有破斷見孤邑。江流照飛甍。暮色四山起。愁斷數猿聲。皆雲安景象。○元和志郡有鹽官橋官。今五峯驛前有橋官堂也。宋李璣雲安橋官堂記云。建炎中改軍爲縣。隸于夔。猶存使名。官儀仍備太守之略。而時節得以奏章自達於朝。他邑莫比焉。治內有杜鵑亭。杜詩雲安有杜鵑。名本於此。

杜詩又曰。峽裏雲安縣。江樓翼瓦齊。兩邊山木合。終日子規啼。按杜鶻子規共一鳥。蜀本紀以爲望帝所化。詳在方物中。予過雲陽。題杜鶻亭詩云。春林血淚染山青。羈客中宵忍淚聽。何處蜀山不啼遍。雲安偏有杜鶻亭。又過雲安絕句之三云。也是山青水碧時。客懷何事動深悲。春林三月無行迹。君未前來聽子規。蓋兩用之。○方輿勝覽云。飛鳳山與縣治相對。古刻鳳凰巖三字。瀑布泉出焉。注於白玉池。產太乙元精石。按張桓侯祠設在此山之脊。馮當可所稱武烈祠也。有石如杵。黝而澤。設在案前。卽元精石矣。○經云。江水又逕東陽灘。註云。江上有破石。故亦通謂破石灘。苟延光沒處也。常璩曰。水道有東陽下瞿數灘。山有大小石城。靈壽木及橘園也。水經註曰。江水過下瞿灘。左則湯溪水注之。水源出縣北六百餘里。上庸界。南流歷縣。翼帶鹽井一百所。巴川資以自給。粒大者方寸。中央隆起。形如張傘。故因名之曰傘子鹽。有不成者。形亦必方。異於常鹽。王隱晉書地道記曰。入湯口四十三里。有石煮以爲鹽。大者如升。小者如拳。煮之。水竭鹽成。蓋蜀火井之倫。水火相得。乃佳耳。湯溪下與檀溪水合。上承巴渠水。巴渠南歷檀井溪。檀井入湯水。湯水又南入於江。名曰湯口也。○唐商真君飛昇記云。雲安風俗淳厚。陶染真風。如翟法言。楊雲外之徒。繼出。故琳宮祕館。獨盛他處。輿地紀勝云。棲霞觀舊名昇雲宮。在縣北一十里。宮據山絕頂。下瞰羣峯。培塿可數。唐翟法言於此修煉。白日仙去。巨柏參天。皆二仙手植。殿左有五龍池。能興雲致雨。碑目云。唐雲外尊師碑在雲昇宮。杜光庭文見九域志。今名棲霞宮。又曰。縣西四十里集靈觀。有碑云。象山福地。玉華仙館。唐商真君飛昇之所。○又曰。縣西百里有上下巖。黃魯直云。唐末有劉道者。聞道於雲。

居膺禪師。爲開巖第一祖。法號道微。自鑿石龕曰。死便藏龕中。不用日時。門人奉其命。二百年來。遊者題詩。不可勝讀。莫能起此開巖者。故予作詩表見之。云。空巖靜發鐘磬響。古木倒掛藤蘿昏。莫道蒼苔鎖靈骨。時應持鉢到諸村。又云。寺古松楠老。巖虛塔廟開。僧緣蠶麥去。官數荔枝來。石室無心骨。金鋪稱意苔。若爲劉道者。拽得鼻頭回。自註云。其一用楊子安韻。一用王定國韻也。按下巖卽燕子龕。見郭信可詩矣。王維贈燕子龕禪師云。山中燕子龕。路劇羊腸惡。裂地競盤屈。插天多峭崿。瀑泉吼而噴。怪石看欲落。伯禹訪未知。五丁愁不鑿。上人無生緣。生長居紫閣。六時自槌磬。一飲尙帶索。種田燒白雲。斫漆響丹壑。行隨拾栗猿。歸對巢松鶴。時許山神請。偶逢洞仙博。救世多慈悲。卽心無行作。周商倦積阻。蜀物多淹泊。巖腹乍旁穿。澗脣時外拓。橋因倒樹架。柵值垂藤縛。鳥道悉已平。龍宮爲之涸。跳波誰揭厲。絕壁免捫摸。山木日陰陰。結跏歸舊林。一向石門裏。任君春草深。郭印題雲安下巖云。地涉雲安境。山名燕子龕。簾垂看急溜。蓋偃得修楠。牢落前賢蹟。光明有佛龕。幽禽知客至。一一解元談。趙抃過雲安。軍下巖僧舍云。幽寺倚巖阿。雲扉掩薜蘿。老僧中燕息。誰問世風波。喻汝礪雲安下巖次。涪翁韻云。徑向山腰轉。門從水面開。片雲巖下宿。一鉢朔方來。落日鳥衝樹。輕陰花覆苔。惟應荔枝熟。時躡白雲回。又路暗松杉密。天空霧雨開。山容依檻轉。鳥影度江來。汲水僧歸寺。銜花鹿印苔。年年蠶麥熟。貧道輟齋回。宋肇題下巖云。古寺依叢壑。雲深暗薜蘿。山僧眉睫異。林鳥語聲和。絕壁疑無路。長江忽自波。暫來還趣駕。衰早倦經過。又下巖逢雨云。地險重樓仄。巖虛古殿開。泉鳴風處瀨。石暗雨邊苔。黃葉曾攀柳。青梢未折梅。居僧因解笑。歲晚

尙西來。又嵐光分碧瓦。江影動丹扉。林鳥拳晴竹。沙鷗印夕霏。風幡空自舞。雲岫幾時歸。石室君無問。塵埃萬事非。又盡把蕭疎鬢。難勝浩蕩愁。西風吹落日。小雨弄殘秋。堙沒千山瘴。掀騰萬壑流。宦途如客路。吾意轉悠悠。黃人傑題云。十月水痕瘦。維舟過下巖。鷗行沙作路。龍像石爲龕。風定煙光合。霜迴日色酣。賦詩無好語。聊用志瞿曇。李燾和黃豫章韻云。山與蜀江並。巖從天漢開。禪僧若箇住。詩客幾人來。金闕掛白練。石龕封綠苔。攜家便堪隱。歸櫂重徘徊。宋永孚詩云。江漲桃花後。風熏荔子前。來瞻千億佛。去此十三年。巖溜翠常滴。林花紅欲然。因知山與石。本性亦虛圓。又兩山中斷曉天開。萬頃無波浸綠醅。巖外水簾垂到地。坐看煙雨過江來。楊邁下巖詩云。竹樹藤蘿密復疎。路迴崖斷見精廬。龕藏衲子千年骨。神護涪翁半壁書。落日紅光浮戶牖。曉雲空翠滴衣裾。塵勞獨愧山僧靜。一飯跏趺不願餘。又下巖避暑云。古寺從來輿轉添。舟中中暑正炎炎。野僧引客登山閣。稚子穿雲放水簾。熱得清涼身暫健。懶使閑靜意難厭。人間劫火方撩亂。法雨何如爲普沾。令狐慶譽詩云。地遠塵寰不染埃。懸崖屈曲寄層臺。山頭玉溜隨簷滴。巖下金容就石開。寺影不妨流水過。松香常逐好風來。徧遊未盡無窮景。爲報舟人且莫催。杜東之詩云。濤江翻雪捲胡灘。晚泊巖扉暫解顏。夙有靜緣逢寺喜。老無生理伴僧閑。殘雲已斷獨飛雨。落日將沈卻照山。半夜秋聲驚客夢。一簾珠貝冷珊瑚。閩人朱煥下巖次韻云。勝地都無一點埃。脩脩野竹映樓臺。僧同巢鳥林端見。佛顯靈光石面開。道者已隨鸞鶴去。世人特爲水雲來。登臨清興無窮盡。一下層巒暮色催。○予以萬歷壬子暮春過此作詩云。病中入寺情相得。雨後看山興轉添。片石僧寮無結構。一

春巖溜自垂簾。題名刻像成今古。背路臨江恰見潛。我已忘機來此地。白雲溪鳥莫猜嫌。因遍訪諸石刻。其可見者游仲鴻。游季祥未遊。時段謙仲適尉此邑。邂逅巖中。酌酒共坐而去。淳熙乙巳四月十四日也。○軍守張吉。監井史澤。判官陳爽。以嘉祐六年五月二十一日至寺下。偶新蓬州司理向宣顏偕遊。○資郡張良能少穎。解褐西泝。艤舟來謁。尊者拜三先生遺像。紹定庚寅仲春念一日。男遠卿侍。○杜世東就銓西歸。謾書絕句。往年題柱記行色。今日支筇還獨來。道者相看定相笑。若爲牽得鼻頭回。○樂溫尉鐘涪陵尉鄭階平。治平乙未六月五日同遊。住持本院主僧法能刻石。

開縣

舊漢豐縣也。華陽國志云。漢豐縣建安二十一年置。在巴東郡西北彭溪源。寰宇記云。後周改漢豐縣爲永寧縣。今州西四十九里。濁水故城是也。志云。縣南四十里墊江。一名濁水。源出梁山。縣之高梁山。春夏泛漲。人多墊溺。流至渠口。鋪入開江。又云。清水源出萬歲縣之石塔山。西南流經石門山。又西南流經巴渠。故城東。輿地紀勝云。巴渠縣劉宋所置。宇文氏改爲萬歲縣。以縣北有萬歲谷也。舊址在今縣東北五十里。卽宋之清水縣矣。○縣西北一里有盛山。以唐刺史韋處厚著名。韓愈作盛山十二詩序云。韋侯昔以考功副郎守盛山。人謂韋侯美士。考功顯曹。盛山僻郡。奪所宜處。納之惡地。以枉其才。韋侯將怨且不釋矣。或曰不然。得利則躍躍以喜。不得利則戚戚以泣。若不可生者。豈韋侯之謂哉。韋侯讀六藝之文。以探周公孔子之意。又妙能爲辭章。可謂儒者。夫儒者之於患難。苟非其自取之。其拒而不受於懷也。若築

河隄以障屋雷。其容而消之也。若水之於海。冰之於夏。日其翫而忘之。以文辭也。若奏金石以破蟋蟀之鳴。蟲飛之聲。況一不快於考功盛山。一出入息之間哉。未幾。果有以韋侯十二詩遺余者。方且以入谿谷。上巖石。遂追雲月。不足日爲事讀而詠歌之。令人欲棄百事往而與之遊。不知其出於巴東以屬胸臆也。於時應而知者凡十人。及此年。韋侯爲中書舍人。侍講六經。禁中侯名處厚。和者通州元司馬名稹。爲宰相。洋州許使君名康佐。爲京兆。忠州白使君居易。爲中書舍人。李使君景儉。爲諫議大夫。黔府嚴中丞武。爲祕書少監。溫司馬造。爲起居舍人。皆集闕下。於是盛山十二詩。與其和者。大行於時。聯爲大卷。家有之焉。慕而爲者。將日益多。則分爲別卷。韋侯俾余題其首云。○韋處厚詩。激曲縈飛箭。浮溝泛滿卮。將來山太守。莫向習家池。右流杯渠。不資冬日秀。爲作暑天寒。先集誠非鳳。來翔定是鸞。右竹巖。巉巖雪中嶠。磊落標方峭。勿謂枕蒼山。還當礎清廟。右繡衣石榻。註爲溫侍御。置雨合飛危。砌天開卷曉。窗齋平聯。郭柳帶繞抱城江。右宿雲亭。夾岸凝輕素。交枝漾淺淪。味調方薦實。臘近又先春。右梅谿。噴日舒紅錦。通蹊茂綠陰。終期王母摘。不羨武陵深。右桃塢。疏鑿徒爲巧。圓窪自可澄。倒花紛錯繡。鑒月靜涵冰。右葫蘆沼。顧渚吳商絕。蒙山蜀信稀。千叢因此始。含霧紫英肥。右茶嶺。繚繞緣雲上。璘玢瑩玉聯。高高層幾折。極目瞰秋鳶。右盤石磴。徧地堆層疊。因崖遂削成。淺深嵐嶂色。盡向此中呈。右琵琶臺。綆汲豈無井。顛崖愧深淥。願灑塵垢餘。一雨根莖潤。右上士瓶泉。註爲柳律師置。初映鉤如線。終銜鏡似鉤。遠澄秋水色。高倚曉河流。右隱月岫。張籍和云。獨入千竿裏。緣巖踏石層。筍頭齊欲出。更不許人登。右竹巖。曲沼春流滿。新蒲映

野鵝聞齋朝飯後。拄杖繞行多。右葫蘆沼。月出深峯裏。清涼夏亦寒。每嫌西落疾。不得到明看。右隱月岫。臺上綠羅春。閑登不見人。每當休暇日。著履戴絃巾。右琵琶臺。清淨當深處。虛明向遠開。捲簾無俗客。應只見雲來。右宿雲亭。自愛新梅好。行尋一徑斜。不教人掃石。恐損落來花。右梅谿。山城無別味。藥草兼魚果。時有繡衣人。同來石上坐。右繡衣石榻。紫芽連白蕊。初向嶺頭生。自看家人摘。尋常觸露行。右茶嶺。階上一眼泉。四邊青石甃。惟有護淨僧。添瓶將盥漱。右上士瓶泉。綠酒盈白杯。隨流去復回。似知人把處。各向面前來。右流杯渠。累石盤空遠。層層勢不危。不知行幾里。得到上頭時。右盤石磴。春塢桃花發。多將野客遊。日西殊未散。看望酒缸頭。右桃塢。○此方洞壑聯屬。而溫湯洞爲最。杜光庭錄異記云。開州後倚。盛山東枕。清水泝江而北三十餘里。至溫湯井。井有湯泉。在北山上。麟德年。因雷雨震霹。山腳摧裂。洞門自開。當門有石鐘。自然成形。如數千斤鐘大。懸身去地二尺許。外象鐘而中實。扣之無聲。門兩壁有石如金剛力士之形者數人。鐘旁有小徑。高六尺已來。行二三丈。稍闊有石碑。巨龜負之。自然而成。但無文字而已。碑側有巨屏。上與頂相連。下有一穴。側身可入一二尺許。自是廣闊。中有路徑。平坦與常無異。路之左右。滴乳爲石。羅列衆形。龍鱗。鸞鶴。頽雲。巍山。如林如柱。似動似躍。乍飛乍顧。千形萬態。不可殫紀。僅一里許。傍竦蓮臺。周迴數步。高三四丈。層綴重疊。皆可攀躋。旋生石乳。如臂如指。者以燭照之。通透瑩徹。隨折脆斷。及出洞門外。得風皆爲白石矣。自臺側三四十步。有蓮花羅布於地旁。有甘泉水色溫白。遊者烹茗於此。前有橫溪。湍波甚急。其聲喧洶。流出洞外。溪上有橋。長二三丈。闊一丈許。非石非土。功甚宏壯。過橋

得黃土坡高四五丈。道徑險滑。行者累息。方至其頂。坡上有巨堂。四壁平淨。中高數丈。壁上皆有遊山之人題記。年月堂之極處。曲角有一穴。高四五尺。廣三四尺。去下丈餘。躋攀莫及。相傳云。昔有遊人攀緣而入。累月之後。出於巫山洞中。自後無復敢入者。

大寧縣

水經註。巫溪水。又逕北井縣。西東轉。歷其縣。北井南有鹽井。井在縣北。故縣名北井。建平一郡之所資也。鹽水不通。巫溪溪水。是兼鹽水之稱矣。○勝覽云。寶山在大寧監北十七里。半山有穴如瀑泉。卽鹽泉也。山有牡丹芍藥蘭蕙雜花卉。圖經云。一泉之利。足以奔走四方者此矣。知監正子申大寧志序云。一溪前陳。可濯可沿。衆峯巉絕。如削如畫。亦峽郡之桃源也。○紀勝云。觀音巖在監治東鳳凰山。郡守張孝芳愛其類湘中山水。暇日窮討。得月窟雲巖釣雪玉環浮玉寶華之勝。又云。距城二里。兩江合處。中有石巖峙如門。高二三丈。溪流噴如瀑布。謂之南淵。鹽官孔嗣宗春日與客泛舟。飲於綠陰下。商民鼓吹隨之。其樂不減於蠶市矣。○志云。二仙洞去鹽場二里。一名王子洞。山高百餘丈。上下皆削壁。惟一徑寬二尺。長四五丈許。始達中可丈許。凡遊者不敢下視。洞口寬高十餘丈。深不可測。巖上石文生成千字。水出石筍。四時不絕。相傳昔有王子探樵。見二人圍棋於此。局未終而斧柯已爛。其人仰壁留題而去。詩曰。仙人洞裏無春秋。白雲深處心悠悠。爛柯樵子半途客。安得乘風駕玉虬。千年勝事今朝說。一一重重心練結。從來流水與高山。更有清風共明月。王子後不知所終。但傳蛻仙骨長丈餘。○碑目。丁晉公謂夔州移城記云。

開寶伐蜀師分劍巫而入時灑瀨激射樓舡戰艦難進易退步騎自襄州西山裹糧兼行林麓無際澗壑相接不知道路之所從得蜀民詣王師獻書由大寧路直取夔州平蜀之師實取道於此也景德三年記

大昌縣

水經註云巫溪水源出宣漢縣南逕建平郡之泰昌縣南卽大昌也○寰宇記云千頃池在縣西三百六十里波瀾浩渺莫知涯際分爲三道一道東流當縣爲井源一道西流爲雲安縣陽溪一道南流爲奉節縣西瀼水○杜甫西閣三度期大昌嚴明府同宿不到詩云問子能來宿今疑索故要匣琴虛夜夜手板自朝朝金吼霜鐘徹花催蠟炬銷早鳧江檻底雙影謾飄飄

建始縣

三國時屬吳之建平郡隋開皇爲業州今縣東三十五里有州基山是其處○黃山谷馬上口號呈建始李令云驛亭新似眼波明箐路開如掌樣平誰與長官歌美政風搖松竹是歡聲志云縣西三里有石通洞壁刻涪翁二字蓋山谷曾來遊也○志又云縣西五十里石乳山山石層疊多生石乳其上置石乳關

